

Maakî Yagaala tewaanya' Maakiyai yidaavakesira.

Joni bavitaaziya yadei wijawaakakevinesî.

(Matiyui 3:1-12; Lukî 3:1-9,15-17; Joni 1:19-28)

¹ Gotiyare Gawaalivaangei Jizaazai Kiraazitiyai gamire yagaala tewaanya mudike' sinnawi yima'na'.

² Gotiyare wi'nawijiwaakakei Piropetiya Azaayai dara dinî' Jizaazarîna, "Yithaa, nîmire widaasadinayi giminyîna waamanî'.

'Gimire tusavi nayaa yadera,' githiwa.

³ Wawinya maayaba ja'maanguraaya' yîmanî',

'Naangei batherîne tusa' javada'galyîlo!

Gamire tusangi yida'na jamakwilo!' "

⁴ Sara dinike'na Joni wawinya maayaba mwaalaka sinnawi sagaa' a'mweraavi aalyavi bavitaaziya yada widîna "Sarîmire simunyabwi mudikebwi yawîramaa'na kyapiji nîmî bavitaaziya yîhyîdeinyî. Gotiyai sarîmire kayaa'nanyabwi yîhîmarasî'nadelyîra," widîna Joni.

⁵ Sara widîna yadaa'nyî "Gaminyawîna wawaaji yagaala sa' kadîka wi'naana!" deva Kwaaka Juthiya mwaalyaraji Anga Jeruzaalemi mwaalyaraji yuyara wîna. Mi'na wîna yeva gamire yagaalya' wi'neva wijalikurakîna "Nebulyasîra. Nemi kayaa'nanyabwi sana

sana yiwosira.” Wîdîna kye! Aalya Jothaniyavî bavîtaaziya ya! Jonî.

6 Jonî baazi'ma'nya kaameliyavîre arîlya' yavîkarinîke' marira'nyîna yaka bulîmakaawomunnaanya marida mwaalakelyî. Gannya wapaaya baarînnajî aakangîre kwarakajî tîka nada mwaalakei.

7 Yagaala da' wîdîna “Nîmî bîweinyî. Dîvi pwai bathelyîra. Nîmîre diragînya' wa'dî'nyî kîrî' gamîre diragînya naange' nabaai wavîla'na yadesî nîmîrevî. Naangere kwaari'masîvîlyavî wîla pwîyînîke' kwadaai gîla'mwî galyaa'mune' nîmî naangeinyî mîka. Myîwîneinyîra.

8 Nîmî aalya gavevî bavîtaaziya yîhyîvanîge sa' Naangei Kurya Tewaanyarî bavîtaaziya yîhyadelyîra,” wîdîna ya!.

*Aalyavî Jonî Jizaazarî bavîtaaziya yake'nesî.
(Matîyui 3:13-17; Lukî 3:21-22)*

9 Jonî sara wîdadaasiyagaa' Kwaaka Galîli Anga Naazaretîdaa'nyai Jizaazai bîna kya' Aalya Jothaniyavî Jonî bavîtaaziya yîna.

10 Mî'na bavîtaaziya yîna kya' aalyavî sai bilaawaka yîme'nyî'bi' dara wanganake' “Sîgunya' tîvî damujaangîka! Kekwai Kuryai kwaamîryaibîsai daimwaabîka!” Mena kada' Kuryai walaabîna yaka gamîre munyîkî kusawî bulamwaaina.

11 Bulamwaaina kya' Sîgunyavîdaasî Gotîyarebadaasî Gotîyai yagaala wîdîna “Saigî, nîmîre Nyîbwaalîvaangeigînyî. Kurya tewaanya gukadînyaigînyî. Sahwaigî yîlaaya nyîgaimanîgî,” wîda!.

*Kayaa'nanya'na Saataani Jizaazar'i
widake'nesi.*

(Matiyui 4:1-11; Luk 4:1-13)

¹² Yime'nya'bi' Kuryai “A'mwera maayabanna yarai diwo!” jiri'galaasa'.

¹³ Jiri'galaasina kya' sahwai kaanna wina kya' yirika a'mweraare sivilatiraai kwavilava' a'mwera maayaba mwaaidisi Saataani “Kayaa'nanyabwi yana!” daka yaamiji yijiwaala'. Yijiwaaina yakegaa' malakayaawaryarana mwaaidapiyaba Jizaazai sarari ye'mwannamwaaina ya'. Sahwai saba mwaalakegaa' Gotiyare mamaayara ejeliyara wigaimwanna ye'.

Jawinya maaryaraavi wida' Jizaazai.

(Matiyui 4:12-17; Luk 4:14-15)

¹⁴ Di'vidaa'nyi' Jonimi wila yirakina kye' Jizaazai Kwaaka Galilina wilaawina yaka saba Gotiyare yagaala tewaanya' wijiwakamarina.

¹⁵ Wijiwakamarina yakegaa' wida' “Dahaa' yemwaalyagaa' aayasira. Dahaa' yunegaa'nanyi'. Gotiyai a'mweraavi' maremwaaidehaa' yima'niwa' dahaa'. Gotiyarina sarimire simunyabwi mudikebwi jawiramaarila! Yagaala tewaanya' wi'napiji 'Nebulyasira. Sara yaana!' dithinyide'na yihithiwa. Yagaala sa' nayaa dilimwagarila!” wijiwaakina ya'.

(Matiyui 4:18-22)

¹⁶ Galili aalibumaangevi sahwai wodaa'nyi' Saaimoniji Saaimonimire gahwaalaangei Ediruyalyi sadaraai jawigilya' aalyavi marasi'na

yadaakilyi wangamabina ya'. Marasi'nagile' dare'nesi. Jawinya mwagi'nagilyaraalyi.

17 Wangamabina yaka wida' "Dinyimidinaabyila! Kanyimidinaabakilyi kihiziwaaka'muri jawinya maa'ditabaabib' Gotiyarine a'mweraavi maarya'neraaihiri yihimwaaihideraaihilyira."

18 Mi'na kuda' yime'nya'bi' kirinnya jawigilya yagalya'ma'na yagila midinna yagi.

19 Midinna kyagi Jizaazai pizigwa wawaka Sevathiyare gawaali' kwaraai Jemizalyi Joniji sadaraai wanganakeraai sipiyavi mwaalagila jawigilya kayaaka yinike bi'nyina yagi.

20 Bi'nadaakilyi yime'nya'bi' jaka widina kya' "Yarai dulaabila!" kirinimaangei Sevathiyalyi gannya nigwawawinyarari sipiyavi mwaalesaraavi yagalya'ma'na yagila kidaraai gaminyi midinna yagi.

Jizaazai yimakeri marasi'na'.

(Luki 4:31-37)

21 Kumi sara angeba Kaapaniyamina wina kye' Juyaraavire Kwazaakegaa' yima'nyina kya' yime'nya'bi' gami Juyaraavire Lotuangevi wina yaka Gotiyare yagaala wijiwaakina.

22 Wijiwaakina kya' yuyara gamire yagaalya' wi'neva atika maru'na'muluna ye'. "Kiwijaraavirebwi kwaasi kwaasiya'bisabulyi. Jizaazai gannya simunyavi yuya yawi'nikelyi," didaapi atika maru'na'na ye'. Sare' dare'nanyi. Jizaazai diraginya kininnakei wijiwaakake'nanyi.

23 Yi'me'nya'bi' a'mwei yimaka widei Lotuangevi wilina yaka

24 jaka danganna “Jizaazai Naazreti mwaalyaigi, neminyi beri' dineyide'na bahineka? Nemi aa'neinaavi kayaaka dineyigaide'na daaka? Giminyina yawi'mwa. Gotiyare tewaanyaiginyina yawi'mwa.”

25 Mi'na jaka kada' Jizaazai maanga wida'na “Yagaala madinnera! A'mwe saridaasi diwona!”

26 Sara kuda' yimakei a'mweri yikilaaka wilaka jaka naanga daka kaanna wina ya'.

27 A'mwera yuyara tinna wanganeva atika maru'nakulina yadivi' kumi sara dine' “Ai, da' berivaka? Wijawaakya'ne' mudikesi. A'mwe sai yagaala diraginna widivanikelyi. Nabaai yimakeraavi sara widiwake sara yivanigava!”

28 Kadine' yi'me'nya'bi' Galili yuyabanyara Jizaazai yake'na maalikegaa' wi'nyina ye'.

Jizaazai a'mweraavi tewaanya ya'.

(Matiyui 8:14-15; Luki 4:38-39)

29 Yi'me'nya'bi' Jizaazai Lotuangevida'nyai bwalyuna kya' Jizaazalyi Jemizalyi Joniji pwaraji sara kaanna wina yeva Saaimoniji Ediruyalyi saraare angevi bwina ye'.

30 Bwina kye' midika wida'daasi Saaimonimi ganyaalimaange' wa'disi yi'me'nya'bi' kumi Jizaazari wida'na.

31 Mi'na wida'na kye' nabalinakeyabanna bina yaka maradhaa'bwa'na ya'. Jizaazai sara kya' nabalya' mena yiwina kya' a'mwe' kuminyine wapaaya yovirawakina ya'.

(Matiyui 8:16-17; Luki 4:40-41)

32 Nyilyai mena walakyagaa' sabanyara nabalinakengiji yimaka widivisangiji sangi gaminyawinna makuna ye'.

33 Makuna yeva saba mwaalyara yuyara tikuryaba davaabina ye'.

34 Davaabina kye' Jizaazai a'mwe nabalya ge ge wa'divisaraavi nabalya' wangadaa'nyi "Tewaanya jima'nana!" sana sana kuda' tewaanya yima'nigulina ye'. Nabaai aa'ne kwalaalyaraavi widaasina ya'. Aa'nera gaminyina yawi'daapiya'na wangada "Yagaala madipinera! Kwaasi yadivisaihiri nayihu'nipidika!" widaka widaasina ya'.

Kwaaka Galili Jizaazai wijiwaaka'.

(Luki 4:42-44)

35 Jizaazai se wa'mwarakei yirikunyagaa' dikaa'na yaka walyuna yaka a'mwera maaya kunebanna kaanna wina yaka Gotiyari yagaala widina.

36 Kuna widina yadaa'nyi Saaimoniji gaminyaba mwaalesaraji biribirikaanyara wina yeva

37 yiri'maa'na yeva wide' "Yuyara giminyina biramarivanigava a'mweraava."

38 Tivi'na kude' gami widina "Angeba pin'i aya kibanna nemi kaanyaana! Anga saba Gotiyare yagaala wijiwaakide'na bwalyuwa."

39 Widaka Galili yuyaba kumire Lotuangengi yagaala Gotiyare wijiwakamarya'. Sagaa' a'mwe yimaka widivisaraavidaasa yimakeraavi widaasa'.

Samatanakei tewaanya yima'na!
(Matiyui 8:1-4; Luk 5:12-16)

40 A'mwe samatanakei gaminyawinna bina yaka “Jizaazai naangelyi,” daka kwadaai gilina yaka yagaala naanga diraginna wida! “Nimire kilaakeji! ‘Tewaanya mwaalana!’ nyawi'diza! gim+ sara dinyavada'gala! Sara yinneiginy+ gim+.”

41 Widina kya! Jizaazai kale kwia! ata dathiwanna yaka widina “ ‘Sara yima! yawi'manige. Gimire kilaakeji! yihula dana!”

42 Widina kya! yime'nya'bi! samate sa! ya'ma'na yaka gamire kilaakejiki yarai yiwina ya!

43 Kilaakejiki yiwina kya! Jizaazai maanga widina yaka

44 widina “Nayaa dinyu'nana! (Niminyina naji'bwa'nemwaaibithika!) A'mwe aane pwai kwar+ ‘Sara nyiwaka,’ mudinna! Aane piri! kiri! mujiwaakinna! Aawa. Kaanna wawa'gizi sipizipiya Gotiyarina mubithika yira'deri piriziyari duziwaainana! Dahaa! kilaake! tewaanya warike'na Mozizai dinike! Gotiyarine! dumaaride'na a'mwera yawi'na ‘A'mwere samate! menanyira,’ gyawipi'dera.” Mi'na widaka yime'nya'bi! widaasina ya!

45 Sara kudaasa! a'mwei walyuna yaka yuyaba yagaala sa! wijiwaakya'nei yuyaraavi widivainadaa'na yikwaasa!. Gam+ sara kya! “A'mwera nyanganapiji niminyina nanyidahid+wagamaremwaabithika!” daka Jizaazai angeba mwiyai yaayeba mwaalina

yadisi gazabazabadaa'nyi gaminyawinna
yikabina ye'.

2

Jizaazai yaginya bainikeri yidikavamwaaiha!
(Matyui 9:1-8; Lukî 5:17-26)

¹ Sawita pijaa' kajinna' sai Kaapaniyamina
ayina yagalaawaka bamwaaina ya'.
Bamwaaidi'nyi dara wi'nesa' "Anga aya
mwaidevi damwaali!"

² Sara deva kwala yi'bwa'nyina ye'. Kwala
yi'bwa'nyina yeva tikuryaba daavanneba kune
pi'ba madaayi yeva angavine' mwasabanne'
bamwaihwodapi yagaalya' wijiwaakina ya'.

³ Wijiwakadaa'nyi pwara makabina kye'
a'mwe daraai daraalyara kilaaka yaginya
bainikeri marikwavamakabina ye'.

⁴ Marikwa'na yeva "A'mwe kwalaalyara
damwaaihava!" deva kwala bwa'naanyavine'na
Jizaazaryawinna mabamakulyara angevi
a'ba bamaraga'nigilaawina yina yeva
munyaba Jizaazai wlamwaaidisiyaba kwavisa'
daburaabina yeva yaginya bainikei yi'binnakeri
marala'mwagakina ye'.

⁵ Marala'mwagakina kye' Jizaazai kumire
limwangebwi yawiranganna "A'mwe dara
'Jizaazai diraginaangei a'mweri' tewaanya
negaimwagathelyira,' yawireva makab+waava,"
Jizaazai yawiraka yaginya bainikeri
widina "Nyibwaali', gimire kayaa'nanya
gimarasimwa."

⁶ Sara wiđina kya' Kiwijara pwara saba mwaal-eva kumire kunya yawi'na

⁷ “A'mwe dai yagaala sa' baa'na ðivanika! 'Gotiyari wavi'la'mweinyi,' dathivanika! Kayaa'nanya aai marasi'nadelaka! Gotiyai gavei marasi'nadelyira. Sare' Gotiyari yagaai'raizika ðiwakei daaka!” yawiranganna ye'.

⁸ Yawirangadaapi yime'nya'bi' Jizaazai gannya simunyavi yawi'na “A'mwe dara sara jawi'manigava!” daka wiđina “Sari'mire simunyangi sare' baa'na yawi'manigava!

⁹ Darewaai naangewaai midaaka! Piri' dare'. Yagi'nya bainikeri wiđide' 'Gimire kayaa'nanya gimarasi'mwa.' Piri' dare'. Wiđide' 'Dithikaaka! Yi'binya' maara'gizi ðimakwalyona!' Yagaala yuya sawaai naangewaai midaaka! Ni'mi kuda'muri 'Dithikaaka! Yi'binya' maara'gizi ðimakwalyona!' sara yade'na

¹⁰ sarimi yawi'na 'Ai, Kwaaka davaki a'mwe sai kayaa'nanya marasi'nya'nei ðiraginnakelyi,' jawiryideihilyi. Sara jawiryide'na A'mweraavine Kaimiraayai yagi'nya bainikeri sara wiđana!”

¹¹ A'mweri wiđina “Githiwa, 'Dithikaaka! Ginnya yi'binya' marikwava'gizi ginnya angevina ðimakwalyona!' ”

¹² Sara wiđina kya' daavaka yime'nya'bi' yi'binya' marikwa'na yaka kaanya walyodaa'nyi sare'na a'mwe yuyara tanna wanganna yeva atika maru'nakulina yeva Gotiyari yilaaya yeva “Sabwi nemi sara mwanganyainera,” ðinyina ye'.

Jizaazai Livaayar+ wida' "Nyimidinaama!"
(Matiyui 9:9-13; Luk+ 5:27-32)

13 Jizaazai ayina walyoka aalibumaangevi mwaaidisi a'mwera yuyara yi'bwa'nyina yeva mwaaidapi Jizaazai wijiwaakina ya'.

14 Livaayai Alipiyaazarei taakiziya maa'dei taakiziya maa'deva mwaaidi'nyi Jizaazai wangamabaka widina "Nyimidinaama!" Mi'na widina kya' daavina yaka mijiwina ya'.

15 Livaayare angevi Jizaazai namwaaidisi taakiziya maa'divisarari a'mwe kiwinya maali'na yadivisarari sara Jizaazalyi gamirerari saraayaba mwaalina ye'. Sare' dare'nesi. Kumi sara kwalaalyara gaminyi midinesara.

16 Namwaaidapi Kiwijara Periziyara "Gami salyi kiwinya maali'na yadivisarari taakiziya maa'divisarari je'mwannanivanigava!" deva gamireraavi widina "Taakiziya maa'divisaraji kiwinya maali'na wiyadivisaraji saraayaba baa'na nivanika!" widina.

17 Yagaala sa' widina kye' Jizaazai wi'nakei widina "Dotarina nabalimaayara wigainadera mi'. Aawa. Nabalinakera wigainadere. Sare'na nimi sainyi a'mwe yida'maraangebulyiyainajiyaraavi jivwaramaarya'neinyi mabye. Aawa. Kiwinya maali'na yadivisaraavine'nanyi."

Wapaaya manya'nesira.
(Matiyui 9:14-17; Luk+ 5:33-39)

18 Pigaa' Jonimireraji Periziyaraji "Gotiyarina wapaaya manaannera!" deva navika mwaaidapi pwara wilaabina yeva Jizaazari widina

“Be'neka? Jonimirerari Periziyaraavirerari sara wapaaya manyara mwaalina yadapi kiri' gimirera wapaaya baa'na nivanigava!”

19 Widi'na kye' Jizaazai widi'na ya' “Mudikangeyabanne munne yadivisagaa' a'mwe' maarade miginyai mwaaidozi a'mwe a'mwera tika munne manipine yipijara daaka!

20 Miginyai mwaaidoriyagaa' wapa' nipi'dengira. Pigasa kima'noj' kuminyabadaasai a'mwe' maarade miginyai yipalasi'na kyapi sagaa' kumi sa wapaa tika manyi yipi'dengira. Sare' kanyipalasi'napiri nimirera wapaaya manyi yipi'dengira.”

21 Sare' Jizaazai gamire yagaala mudike'na widi'na “Yivita gaalya' a'mwe pwai dakuroji' Yivita ayiki miwirima!' myawiryajai tewaanyalyira. Sara miwi'na yaji kwaji miwita'ne yivita yivisiki kayaaka kyadika! Yivita gaalyamili' yivita ayiki kayaaka yade'na naanga lihi'na yadesira.

22 Nabaai memekilaaka waainitalya' a'mwe aane pwai kwai waainitala ayavi waainiya gaalya' mamarad'ngiki yadelyi. Sara marad'ngikaja' aalimaagwala bilamari'bwarakadaawori waainiya' memekilaakevi kayaaka kyoji waainiya' bwalaraawina yadesira kilaaka yuya ti'miwi'roj'ya. Sare' aawa. Waainiya gaalya' memekilaaka mudikevi marad'ngikina yaja' tewaanya warina yadesira.”

Juyaraavire Kwazaakegaa'.
(Matiyui 12:1-8; Luk 6:1-5)

23 Juyaraavire Kwazaaka pigaa' lilaajabita witiwawinyavi tinnyaba tusavi sai widavadaasi gamirera midinaabina, mijika wiadaa'nyi witezila gimujina ye'. Sa'na kiwinya dinike' "Kwaakaanya yamaryadivi' tusavi a'mwera witezila maapika!" dinikesira.

24 Gimujina kye' Periziyara Jizaazari widina "Yithaa, Kwazaakegaa' dahaa' baa'na gimujivanigava! Kiwinya sare'na warikesira. Sa pigaa' dhihimujidengira. Kwazaakegaa' mipinera sabwi!"

25 Sara widina kye' Jizaazai widina "Baa'na nyidiwaava! Ne Deviti yaake pikariyikwiavi tinna mwanganyadivisaihi daaka? Devitiji gamijiyaraji sara wapaaya kunera mijika wiadaa'nyi

26 sipizipiya Gotiyarina Yira'de Naangei Avaayathai mwalyaakegaa' Deviti Gotiyarina yira'de pwarî girikulya'na widaka Gotiyare Angevi wilaabina kyaa' Gotiyai tinna wanganya'ne girikula wakyaasa kujayaa' maranyina yaa'. Girikula sa mi'na kwaryaa' 'Gotiyare yira'divisara gavera maranadivisarera,' kiwinya' sara dinikesira. Deviti Gotiyarina yira'dei mamwalyaakei maranyina yaka nabaai gamijiyaraavina wimaryaa'. Sare' Gotiyai maiyagaala mujaa'."

27 Sara widaka widina ya' "Sinnawi Gotiyai a'mweraavi yavikaryaka dividaasi a'mweraavine'na Kwazaakegaa' wakyaal. Sinnawi Kwazaakegaa' mwaryaka dividaasi Kwazaakegaa'ne'na a'mweraavi myavikaryaa'. Arikewi.

28 Sara yaake'na A'mweraavĩne Kaimĩraayai Kwazaakegaa'ne Naangei 'A'mwera sara sara yipĩ'derera,' wĩdadelyĩra," wĩda' Jizaazai gamĩnyĩne'na.

3

Kwazaakegaa' Jizaazai pware ata kayaa'nanya' nayaa yavada'gala'.

(Matĩyui 12:9-14; Lukĩ 6:6-11)

1 Lotuangevĩ ata pimagi'nyi yaalĩka mena yĩnĩkei mwaaĩdĩ'nyĩ Jizaazai ayĩna wĩlamwaaĩna.

2 Wĩlamwaaĩna kya' "Jizaazai Kwazaakegaa' a'mwere asa' tewaanya yavada'gaina yajĩwaka?" deva A'mwe Perĩzĩyara bangana'na ye'. "Asa' tewaanya yavada'gaina yaja' nemi' kotiya wĩmwaaĩhĩna yaadeĩnaava," deva bangana'na ye'.

3 Nayaa bangana'na yadapi Jizaazai ata kayaa'nanyari wĩdĩna "Tĩnnyabanna dĩthaaka!"

4 A'mweraavi wĩdĩna "Kwazaakegaa'na kĩwĩnya gara dĩvanĩka? Kwazaakegaa'na tewaanya yija'nebwi sara dathĩvanĩka? Kwazaakegaa'na kayaa'nanya yija'nebwi sara dathĩvanĩka? Nabaai 'A'mweraavi tewaanya mwaaĩbĩ'de'na dĩhaimwana!' dathĩvanĩka? 'A'mweraavi dĩramakya!' kĩwĩnya sara dathĩvanĩka?" wĩdĩna. Sara wĩdĩna kya' kumi sara yagaala muji, maadĩnna mwaalĩna ye'.

5 Maadĩnna mwaalĩna kye' kumĩre sĩmunyangĩ ata yaalĩka yĩnĩkerĩna kumĩnyĩ kale mwĩadaa'nyĩ Jizaazai wangamabĩna. Wangamabĩna kya' saraavĩne'na kale wĩadaasi

avaalyagaa' maadîna mwaaidapiyaraavîna gamîre sinna tika wida'daasi a'mwerî widîna "Gînya asa' jîwîbwaka!" Sara widîna kya' ata yîna kya' ata kayaa'nanya' maamîdarya' yîma'nyîna.

⁶ Maamîdarya' yîma'nyîna kya' yîme'nya'bi' Lotuangevî Perîziyara bwalyuna yeva Erotiyarerajî yî'bwa'nyîna kye' jamungaje' "Jizaazai balade'na nemî gara yaadelaka?"

Kwala bwa'naanya aalîbumaangebaari mwaale'.

⁷ Jizaazalyî gamîrerajî saba yagalya'ma'na yeva Aalîbunya Galîlina wîna. Nabaai kwala naanga kaanna wîna. Kwaaka Galîli mwaalyarajî Kwaaka Juthîya mwaalyarajî

⁸ Anga Jeruzaalemi' mwaalyarajî Kwaaka Yîthumîya mwaalyarajî Aalya Jothanî pimagi' mwaalyarajî Anga Taayaa Anga Saaithonî sabanyaai mwaalyarajî yuya sara "Jizaazai sana sana yîvanîkelyîra," deva gamînyawîna kaanna bîna.

⁹ Kaanna bîna kye' kwala bwa'naanya naange'na gamîreraavî widîna "Kwala bwa'naanya da' bule nanyînadîka! Botîya' nîmînyîne' jovîrawakyîla! Aalyavi' wa'dî'nyî botîyavîdaa'nyî wîjîwaakîdeinyî."

¹⁰ Sare' dare'nesî. Sara widîna yake'ne' Jizaazai a'mweraavî tewaanya yavada'gaina kya' nalaavînakera "Jizaazarî yîmetavîma!" dîneva yîmeta'na yesa'na widîna ya'.

¹¹ A'mwe pwara yîmaka widîvîsara Jizaazarî tîna wanganeva gamînyawî

wala'na yeva “Aakayi,” jaka dina “Gotiyare Gawaalivaangeiginyira,” widina.

12 Sara widina kye! Jizaazai yimakerav+ yagaala diragininaanga widina “Niminyina ‘Gotiyare Gawaalivaangelyi,’ madipinera!”

Jizaazai a'mwe atiraai sivilyiridaa'nyi pwaraalyaraavi dahilaka'.

(Matiyui 10:1-4; Luk+ 6:12-16)

13 Jizaazai mugunyangi wilaawina yaka “A'mwera nimirera yima'n+p+'dera,” dakeraavi jaka widina kya! kumi wilaabina ye'.

14 Wilaabina kye! a'mwe atiraai sivilyiridaa'nyi pwaraalyaraavi dahilakina yaka “Niminyaba dimwaalyila! Nabaai yagaala wijiwakamarya'na yihithaasidera!

15 Yimakerav+ widaasa'ne diraginya! yihizaavideinyi,” widina ya'.

16 A'mwe atiraai sivilyiridaa'nyi pwaraala sareraavine yaya darengira. Yi pwai Saaimon+ yaya piri! Jizaazai widake! Pitai,

17 yi pwaraai Jemizai Sevathiyare gawaalivaangelyi Jon+ Jemizare gah-waalaangelyi sadaraai yaya piri! widake Bawanez+zi (aangyagaalya'na Yi'muyagaainakeraai),

18 yi pwai Ediruyai, pwai Pilipi, pwai Baatolomyui, pwai Matiyui, pwai Tomaazai, pwai Jemizai Alipiyazare, pwai Tathiyazai, pwai Saaimon+ “Kumireba Romiyara wipika!” dadei,

19 pwai Juthazai Yizikeriyotiyai dividasi Jizaazari yikamaangeraavina wibwaridaakwa'nei.

*“Jizaazalyi Biyelizivuliji saraai yivanigi,”
wide' Periziyara.*

(Matiyui 12:24-32; Luk 11:14-23; 12:10)

²⁰ Jizaazai gannya angevi wilaabina. Mi'na wilaabina kya' kwala bwa'naanya yi'bwa'namwaaina kye' Jizaazalyi gamireraji sara yina yina yeva “Wapaaya warana! Gotiyare wawinya yaana!” deva wapaaya manyi ye'.

²¹ Wapaaya manyi kye' Jizaazai yake'na gamire jil'kaimiraaya sara wi'neva “Nemi gaminyi marawaana!” deva kaanna bina ye'. Sare' dare'nesi. “Simunya maayai mwaalika,” desa'nanyi.

²² Kiwijara Anga Jeruzaalemidaasara dina “Jizaazari munyiki yimaka Biyelizivuli kininnakelyira.” Nabaai dina “Yimakeraavi maremwaala naangei gannya diraginya' kujaava' Jizaazai yimakeraavi widaasina yadelyi.”

²³ Sara dina kye' Jizaazai a'mweraavi “Kaajila!” widaka ke'ba'na yagaala widina “Saataani Saataanimi gara yoji widaasinannelaka?”

²⁴ Kingiyare a'mwera anga kiba mwaalyara jaapaina yipija' mala bwa'nyina yipija' sahwara diraginya daapine' mika!

²⁵ A'mwe pinidaka kajapalemwalamaryapiji sanidaka diraginya daapine' mika!

²⁶ Savine'na Saataaniji gamireraji jaapaina yipija' mala bwa'nyina kyapiji Saataani maremwaaideva diraginya madaayi yannesi. Aawa. Savine'na Saataani mi'nanyi.

27 A'mwe aane pwai kwai a'mwe diraginyare gilyivisa kuka yipalamaasa'na gamire angevi mulaawi yannelyi. Arikewinyira. Sinnawi sai a'mwe diraginyari wila pwiyaja' divi kuka yipalamaaradelyira.

28 Yagaala da' jawika! Nebwina githima! A'mwera kayaa'nanyabwi yivanigasabwi sabulyi Gotiyarina yagaabiraizika ge ge diza yivanigasaji yivanigasara Gotiyari kudapiji Gotiyai kayaa'nanya sa wimarasi'nadelyira.

29 Sare kiri' Kuryai Tewaanyarina yagaabiraizika widivanigasa yuyagaa' Gotiyai mumarasi'nyi yadelyira. Aawa. Kurya Tewaanyarina birala sabwina yiwetawakya sabwi yuyagaa' yuyagaa' waragothevulyira. Sabwi Gotiyai mamarasi'nyi yadelyira!" widina ya'.

30 Jizaazarina "Yimakei kininnakelyi. Gotiyare Kuryai kininnakei mika," dinesa'na Jizaazai sara wida'.

Jizaazari ganaangesi gahwalaangeraji wilaabe!

(Matiyui 12:46-50; Luk 8:19-21)

31 Sagaa' Jizaazari ganaangesi gahwalaangeraji bi'ma'na. Mi'na bi'ma'na yeva angevi mwasawi daaveva gaminyina pwaraavi widina " 'Gimijiyaraji gwaangesi mwaaihava,' duthaawila!"

32 Sara widina kye' kwala bwa'naanya' gaminyaba wilaamwaaleva widina "Yithaa! Gwaangesi ja'mweraji ja'mweji sa mwasaba bamwaaleva gaminyina jaka divaniga'."

³³ Jizaazai wi'naka ma'maa'na “Ni'nnya niwaa' berivaka? Nyigwaalaangera bewaraavaka?”

³⁴ Widaka gaminyaba bamwaihwoapiyangi tinna wanganaka widina “Yithaanyi! Dathara niwaasi nyigwaalaangeraji mwaaiha'.

³⁵ A'mwe pwara kwara Gotiyai widinike' sara yivanigasara sahvara niwaasi nyigwaalaangeraji nyinyaabulaangeji mwaaihava.”

4

Witizila piraih+rakakesira.
(Matiyui 13:1-9; Lukî 8:4-8)

¹ Pigaa' Jizaazai aalibumaangebaari gaai wijiwaakina. Wijiwaakina yadaasi kwala yibwa'nemwaalesa'na sipiyavi wilamwaaina kya' sipiya' aalyavi a'ba yila'na yadisi kwala bwa'naanya yuya aalibumaangebaari mwaalina.

² Sara mwaalina yadapi Jizaazai wijiwaakya kwalaalya kuminyine'na yagaala ke'ba'na widina ya'

³ “Dinyu'nyila! Yithaanyi, pigaa' a'mwe witizila piraih+rakya'nei kaanna wina ya'.

⁴ Wawaka gannya wawinyavi sila kaviraih+raka' sila pini tu'maangeba bwalaraawina kya' yusara bamaranyina ye'.

⁵ Piba amwi sila naangeji' wa'di'nyi' a'ba kwaaka maalikeji' wa'di'nyiyaba sila pini piraih+rakake witizila yarai yiri'na ya'.

⁶ Yiri'na kya' gannya miwirinya naanga magiri kya' nyila naanga widina yakegaa' yawaka bahinyina yaka yuya balina ya'.

7 Kwaakevi lannake wa'disi a'ba sila pini piraihirakake yiri'na kya' lannake kiniji yiri'na yaka naanga girina yaka kayaaka galadathiwanna kya' kurijirika dina yaka gamire sila mi'nyi ya'.

8 Sila pini kwaaka tewaanyavi kaviraihiraka' sila sa tewaanya yiri'na yaka naanga girina, sila tewaanya yi'nyina ya'. Yi'nyina yake pini sila pirividaa'nyi kibawe (30) yi'nyina ya'. Sila pini sila pirividaa'nyi naanga kibawe (60) yi'nyina ya'. Sila pini sila pirividaa'nyi naanga (100) yi'nyina ya'," sara widina ya' Jizaazai.

9 Yagaala ke'ba'na mi'na widaka Jizaazai widina ya' "Kadi'nakeinyi daakaji nayaa dinyu'nana!"

Yagaala ke'ba'na widaebwines.
(Matiyui 13:10-17; Luki 8:9-10)

10 A'mwe kwala bwa'naanya mena wina yesagaa' Jizaazare atiraai yaka sivilyiridaasi pwaraai saraji a'mwera gamiji mwaaidivisaraji sa Jizaazari yiwara'na "Yagaala ke'ba'na diwaanya' dinejiwaakya!"

11 Sara yiwara'na kye' Jizaazai widina "Yagaala nebulya' yoimavajalikirakya' Gotiyai maremwaaide'ne' Gotiyai yihiziwaainiwaka. A'mwe pwara mwasilaanyara yagaala yuya ke'ba'nanya gave pirivina wi'nivaniga'.

12 Sa'na yima'nya'ne' dinikesira.
Tinna sara wangadivi' kiri' simunya
myawiranganyivaniga'.
Kadika sara wi'nadivi' kiri' simunya
myawiramaarivaniga'.

Yawirapiji mudikebwi yawiramaapiji kwaji
 Gotiyai kumire kayaa'nanyabwi kama-
 ras'nadika!

*Yagaala piraihirakake'na Jizaazai wijiwaaka'.
 (Matiyui 13:18-23; Luki 8:11-15)*

¹³ Sai widina “Yagaala ke'ba'nanya sa'
 myawiryij+waava? Yagaala sa' myawiri yeva
 yagaala ke'ba'nanya pini gara jawiryideihilaka?

¹⁴ A'mwei yihithiwei yisila piraihirakakei
 Gotiyare yagaala wijiwaakadelyira.

¹⁵ Sila pini tu'maangevi piraihirakake
 bwalaraawina kya' yusara maranyina yeta
 pwara Gotiyare yagaala ku'napiji yime'nya'bi'
 Saataani yarei bina yoji yagaala wi'nipija' yarei
 marasi'na yadengira.

¹⁶ Sila amwi wa'disi kwaaka maalikajiki yisila
 piraihirakake pwara sabaai'bi' Gotiyare yagaala
 yime'nya'bi' yilaaya'na wi'nyina yapiji

¹⁷ kumi sara diraginya' kininnakera
 mamwaalyi. Aawa. Divi maalikegaa'
 a'mwera Gotiyare yagaalya'na maanga widina,
 taanginya wina kyapiji yime'nya'bi' Gotiyarina
 yagalya'ma'na yipi'dengira.

¹⁸ Kwaakevi lannake wa'disi sila pini
 piraihirakake pwara Gotiyare yagaala nayaa
 wi'nyina yipi'dengira.

¹⁹ A'mwe sara Kwaaka davakina yawi'na,
 nigwilalaakenna yawi'na, gilyivita naangenna
 yawi'divisara sara yipi'de'na Gotiyare yagaalya'
 kayaaka galadathiwanna kyoji a'mwera navika
 mwaaijara Gotiyare yagaala navika yipi'dere
 waryaanyara.

20 Kwaaka tewaanyavi sila pini piraihirakake pwara Gotiyare yagaala nayaa wi'nyina, daapina yipi'dengira. A'mwe sara Gotiyarine tewaanya yipi'derera. Pwara tewaanya kibawe (30) yipi'de, pwara tewaanya naanga kibawe (60) yipi'de. Pwara tewaanya naanga (100) yipi'desira.”

Laamuyai maa'gulyavi marayulyakina yinike'nesi.

(Luki 8:16-18)

21 Sagaa' sai wida'na “A'mwe pwai laamuyai maa'gulya' mariri'mwagakinikeri lika marulyakadei daaka! Nabaai se warya'ne yi'binya dalaangevi laamuyai lika marulyakadei daaka! Aawa. Yi'binyavi yilakade'nesira.

22 Sare' dare'nesi. Nimi're yagaala aane piri' kiri' lika yulya'nike' divi nayaa yibwaridaakwadesi. Dahaa' wijiwaakiyagaala widadinya aane piri' kiri' bwakakinike' a'mwera myawirivanigasa' 'Divi ku'maayaba yima'naabana!' dena bwakake'nanyi.

23 Kad'i'nakeinyi daakaji nayaa du'nana!”

24 Jizaazai wida'na “Kadika wi'nivanigasa' nayaa jawirila! Yawibwasa' diriviki'de' sa' girivikiradesi. Nabaai piri' gye'mwagahizaavadesi.

25 Sare' dara yithithivanige. A'mwe pwai 'Jizaazare yagaala waburya nyiwaka! Wi'nima!' kadozi Gotiyai yagaala pini wijiwaakadelyira. Pwai 'Jizaazare yagaalya taanga nyiwaka. Wara-aryana!' dazai Gotiyare yagaalya myawiri ya-

jai nimire yagaalya' wasi'najari Gotiyai yagaala pini mujiwaaki yadelyira.”

Wijiwaakiyagaala sila yirita'nesi.

²⁶ Yagaala piri' widina “Gotiyai a'mweraavi maremwaaide' naanga yima'nya'ne'na daresi. A'mwei wawinyavi sila piraihirakadevaabisasi.

²⁷ Piraihirakadevi a'mwei sawisavi se wa'da yirika pu'daasiyavi dikaa'na yada navika mwaaidi'nyi sila piraihirakadengi'daa'nyi bilyiri'na. Bilyiri'na yadevi naanga sara bilyiri'daa'nyiya'na myawiri.

²⁸ Kwaaka gami savidaasi yilaabina. Sinnawi witiya maalike bilyiri'na, divi puriyya y'nyina, divi sila yawaka yina yadesi.

²⁹ A'mwei dara wangade' 'Yawaka mi'na yiwake' daaka!' dada yime'nya'bi' kwaari'mata yadi'mwagakinikesi marawidilavamaa'na yade sila maaryagaa'nanyi. Gotiyai a'mweraavi maremwaaide' naanga yima'nya'ne'na sahirisira. Sare'na a'mwera myawiryarera.”

Wijiwaakiyagaala maaziteti silyanna.

(Matiyui 13:31-35; Luk 13:18-19)

³⁰ Jizaazai widina “Gotiyai a'mweraavi maremwaaide'na be yagaala yihiziwaakijiwana? Sa'na ke'ba'nanya berivi wakaadevaka?

³¹ Darebaabisasi. Gotiyai maremwaaide' sinnawi maalika warina, divi naanga yima'nya'ne'na yisi' maaziteti wo'nikikine sila maaziteti maalikesira. Yuya pini Kwaakevaki naangengira. Yisi' maaziteti aranya naange'bisikira.

32 Yisîla maalîka sa' pwai kwaakevî maraburîna yada yisîla maalîtaayamîlikîdaa'nyî yisî' yirî'na yada naanga girîna yada sigya naange' waayadi'nyî yutara sigunyaviyara gamîre taanyangî arîta yilyalaanna yadivî' kîma'nyawî mwaaidîvisare. Gotiyai maremwaaide' sahirîsîra."

33 Jizaazai yawî'na "Kumîre yawîsa navîla'mudîka! Nayaa yawîpînebaaibî' wîjîwaakîma!" daka ke'ba'nanya kwalaalyangî gamîre yagaala wîdîna.

34 Wîdîna yakevî a'mweraavî ke'ba'nanyanna wîdîna. Kîrî' kîma'nyawî gannya gaveraavî aangyagaala nayaa wîjîwaakîna ya'.

Jizaazai yîhuta naange' wîdaasa'.
(Matîyui 8:23-27; Lukî 8:22-25)

35 Yîrîka savi nyîla kabwalaawa' aalîbumaangevî Jizaazai gamîreraavî wîdîna "Aalîbunya davi kengihîrî ga'makwawaana!"

36 Wîdîna kya' kwala naangengî yagalya'ma'na yeva gamîrera sipîyavî Jizaazai wîlamwaaidî'nyiyavî wîlamwaina kye' gamî kwarijî makuna ya'. Nabaai sipîya pînî aalyavî yîlarake wîna ye'.

37 Kaanna kaanna wodaapi yîhu'maanarya' kya' aalîmavajînaaka sipîyavî yîlawîresi'naabîna kya' sipîyavî aalya buladi'nyîna ya'. Aalya naange' buladi'nyîna kya' gamîrera dara wanganesa' "O, we', nemî balaajîwona!"

38 Deva Jizaazai sipîyavî likimagî mwaalakei dîhaihîsavi se warakerî. Deva

dithikavimwaaihina yeva yarai widina “Aaka, Nejiwaakadinyaigi, nemi yarai nyiwawaadika! Neminyina ‘Nabaipika!’ yawirijivanigi?”

³⁹ Sara widina kye! Jizaazai dikaa'na yaka yihusavi maanga widaka “Mi'nanyira,” aalyavi widina “Aalya'gi jaka madinna! Kave warina ja!” Widina yakevi yihu'maanarya' mi'na muda'na kya' aalya' kave warina ya'.

⁴⁰ Aalya' kave warina kya' Jizaazai widina “Lika baa'na yivaniga! Gotiyari malimwagiyivaniga' lika yiwaasa!”

⁴¹ Gamirera sara wanganeva lika naanga yeva dine' “Yihusasi aalyasi sawaai gamire yagaalya' wi'n'waalya' be a'mwelaka!”

5

Jizaazai yimaka wideri tewaanya yavada'gaina ya'.

(Matiyui 8:28-34; Lukî 8:26-39)

¹ Aalibunya pimagina A'mwe Geraaza mwaalyara mwaaidapij'yabanna y'i'mavaawina kye'

² sahwai sipiyavidaa'nyi walamwaaina yadi'nyi yime'nya'bi' a'mwe pwai simaanga gilaaya wakesabadaa'nyai yimaka widei gaminyina wiji'ma'naabina ya'.

³ A'mwe sai yuyagaa' gilaaya wakesaba mwaalakelyi. A'mwe aane pwai kwai gaminyi seniyabaalyi wila mavwiyi yannei.

⁴ Sare' darevinyi. Kwalaalyagaa' a'mwera seniyabara maareva asiraari wila pwekipwekya sivilyiraari wila pwekipwekya kye' gami

sai asiraarî wîla pwekînikê galayesiwî'na yaka sîvilyîraarî wîla pwîyînikê sîlyalyî livatamayesi'nyîna ya'. Sare' aane pwai kwai diragînnakei sahwari madathîvalyî yannelyî.

⁵ Yuyagaa' yîrikevî sawîsavî gîlaaya wakadîvisabajî mugunyabajî kaanya yamaryada jaka naanga dada gannya kîlaakejîkî sîlyajî livadaidaarivainyîna ya' yîmaka widei.

⁶ Sai saamînyabadaa'nyî daavakei Jizaazarî tînna wanganakegaa' yarai kaanyave'na walyaabîna yaka “Sahwai naangelyî,” daka gamînyawî kwadaai gîlaka

⁷ jaka naanga wîdîna “Jizaazai, Gotîyai Sîgunyavî munya ke'mwî mwaaidereigî midaaka! Nîmînyîna beri' jîzîwaana? Gotîyarîne'na naange' gîthîvanîge. Daanga manyîjaavînnera! Mala manyîradînnera!”

⁸ Sare' dare'nesî, Jizaazai “Yîmakaihi, a'mwere munyîkîdaa'nyî dîwîla!” wîdake'na.

⁹ Sai yîwaara'na yawalyaadî' “Gîmînyîne yaya' berîvaka?” Yîwaara'na yawalyaadîke' yîmaka widei wîdîna “Nîmînyîne yaya' Kwala Naangeinyî. Sare' nemî kwala naangeina mwaiho'nanyî.”

¹⁰ Sara wîdaka yagaala diragînna dîza ya' “Kwaaka daviidaasi yîmakeraavî mudaasînna!”

¹¹ Mugunya sakyavî yaawaryara kwala naanga nîdaa'nyîna yadaapîjî

¹² yîmakera diragînna wîdîna “Yaawar-yaraayabanna dînedaasa! Yaawaryaraavîre munyîkaavî wîmîlaade'na dînedaasa!”

¹³ Yîmakera sara wîdîna kye' Jizaazai

“Yo, diwila!” Wîdîna kya' yîmakera a'mwerîdaa'nyî bwalyuna yeva yaawaryaraavî wîlîna kye' yaawaryara kwala naanga (2,000) mwaaidapiyara dawaanyavî yarai walaawîna yeva aalîbunyavî wala'na yeva yuyara balîna ye'.

14 Saba yaawaryaraavî yî'dîvaîdîvîsara dara wanganesa' “O, akai, nemîre yaawaryara mena davaimwaava!” Deva yarai wîna yîna yeva angebajî wawînyangîjî saraavî wîde' yagaala sa'. Wîdesa'na a'mwera dînyîna “Sara yîma'nîwake' nemî walyanganaana!” dîneva walyaabîna.

15 Jizaazaryawîna walyaabîna yeva dara wanganesa' “A'mwei kwaabîhannya marira'nakei sîduta nayaa yawî'manîkei kîgaa' yîmaka kwalaalyara mwaalesai tewaanyai damwaalîka!” Deva lîka naanga ye'.

16 Lîka kye' a'mwera yuya wanganesara mudîkeraavî yîmaka wîlakerî sara yîma'nakevînajî yaawaryaraavînajî wîjîwaakîna.

17 Sara wîjîwaakîna kye' sabanyara sarî naanga wîdîna “Nemîreba davî namwaaidîka! Dîwona!”

18 Wîdîna yesavî sai sîpîyavî yîladaa'dî'nyî yîmaka wîlakei naange' wîdaanganna “ ‘Gîmîjî mwaaimuneinyî wîma' gîthîwa.”

19 Sara wîdîna kya' Jizaazai wîdîna “Aawa. Sare kîrî' gînnya angevîna wawa'gîzî gînnya jîlîkaimîraayangî Gotîyai sara nayaa gyîwakenna gîmînyîna Gotîyare kale yîwake'na sara duzîwaakya!”

20 Wîdîna yake'na sai kaanna wîna yaka

Angaba Atiraalyaba saba Jizaazai gaminyina sara yakenna sara kujiwaaka' a'mwe yuyara atika maru'na'na yina ye'.

Jaarazare garaavaangesi a'mwe pir'i Jizaazare yivisavi ata yime'nakesi sawar'nesi.

(Matyui 9:18-26; Luk 8:40-56)

²¹ Jizaazai sipiyavi wlamwaaidisi ayihirina sipiya' ayina makuna yakegaa' gaminyawinna kwala bwa'naanya naange' yibwa'namwaaina yadapi sai aalibumaangevi mwaalina.

²² Mwaalina yadi'nyi Lotuangevi maremwaaide pwai Jaarazai wo'nikei bwanganna yaka gamire sivilyaraaryaba kwadaai gilina yaka

²³ yagaala diragina widina “Ninnya taaya nabalinake' balade'na. “Tewaanya' yima'nana! Gaala mwaalana!” da'muji “Nimire asiraai dathiwagaawima!” ' da'gi dulaama!”

²⁴ A'mwei sara widina kya' gamiji wawagi. Kaanya wodaakilyi kwala naange' wawesara gaminyawi galyitata ye'.

²⁵ Galyitata kye' a'mwe nalaavinake' mwaalake' baizaaka ma'nade' yuyagaa' kwarama atiraai sivilyiridaa'nyi pir'waalya wavila'nike' mwaalakesira nalaavinake'.

²⁶ Nalaaya maalika wa'di'nyi nalaavinakevi dotarava yaamiji yiya kye' daanga naanga wivinake'. Gamire yuyajiya mena wijaavina yake'. Tewaanya aane pir'i kiri' mi wiake'. Aawa. A'mwe nigwimaaya' sinnawi nalaaya maalike' kininnake', sagaa' nalaaya naange' kininnake'.

27 Sare' Jizaazarine'na wi'naka kwala naangevi dusidaa'nyi lika yulyaraabina yaka gamire kwaabi+yivisavi yime'nyina.

28 Sare' dare'nesi. "Gamire kwaabi+yivita gavevi yime'n+iwija' nimi tewaanya yima'n+ma!" dake'nanyi.

29 Yime'nya'bi' kurabala yaalika mi'na yina. Mi'na yina yaka dara wanganake' "Nimire nabalya' mi'na daaka!"

30 Sare' yilaaya kya' yime'nya'bi' Jizaazai sahwai dara wanganake' "Niminyi diraginya' nyalyiwake' daaka!" Dakegaa' kwala naangevi yarai ginyiwannaka widina "Nimire kwaabi+yivisavi aai yime'n+iwaka?"

31 Sara widina kya' "Kwala bwa'naanya datha' giminyi galyitata yivanigasa'na gara nediwaa? 'Aai yime'n+iwa?' " wide' gamirera.

32 Widesa' sahwai sare' yake' tinna wanyanya'nei tinna wanganaasina.

33 Wanganasadaa'nyi a'mwe sa' "Nimire kilaakeji' tewaanya' yima'n+iwaka," daka lika yina, bi'bita yaka gaminyabanna bula'na yaka yuya sanna widina.

34 Yuya sanna widina kya' sai widina "Nyiraavi, niminyina nayaa yawiralimwamwaanya'na gim+ maam+darya yima'n+iwaa. Gimire kilaake' kuna warade' kwaamu'na dimwaihwoode'ginyi," widina ya'.

35 Kuna widina yadaa'nyi Lotuangevi maremwaiderera angevidaasi bwalyuna yeva kaanna bina yeva widina "Ginnya taaya' mena baimwaka. Gotiyare yagaala

wijîwaakaderî wawînya naanga kuna minna!
Taanga wijaavanîgînya' kabaimwakîra.”

³⁶ Sahwara wîdadaapi Jizaazai yagaala sa!
kadîka wî'nada Lotuangevî maremwaaiderî
wîdîna “Lîka minna! Nîmînyîna sîmunyavî
diragînna dilîmwana!”

³⁷ Sara wîdîna yaka a'mwe pwaraavi wîdîna
“Sarîmî dîmwaaalyî! Nîmîjî Pitalyî Jemîzalyî Jonî
Jemîzare gya'mwelyî gave saina wawaana! Aane
pwaigî kwaigî aawa.”

³⁸ Wîdîna yaka kaanna wîna yeva Lotuangevî
maremwaaidere angevîna yî'mavaawîna kye!
dara wanganake! “A'mwemîlîka yagaala naanga
baziwodaapi pwara kînna dathîvanîgava!
Jakînna dathîvanîgava!”

³⁹ Mi'na wanganaka angevî wîlîna yaka
wîdîna “Yagaala naangesî jakînnyasî baa'na
dîvanîgava! Taaya' balya myîwa'. Aawa. Se
warî'.”

⁴⁰ Sara wîdîna kya' gamînyîna mayagaaijîka
kamaregye' kîrî' sahwai yuyaraavi mwasawînna
maratîvatawaasîna yaka taayavî ganaangesî
ganîmaangelyî gamînyawî mwaalesarajî sa
makuna kya' taayabanna wîlîna ye'.

⁴¹ Mi'na wîlîna kye' gîlaayavî ata lîmwanna
yaka kunnya yagaala wîdîna ya! “Talîtha kumî!”
aangyagaala dîna “ ‘Taaya'gî dîthîkaaka!
gîthîwa.”

⁴² Sara wîdîna kya' yîme'nya'bi' taaya'
dîkaa'na yaka kaanya dîkavayamarîna ya'.
Sare' dare'nesî. Taaya sa' kwarama atîraai
sîvîlyîrîdaasî pwaraalya wavîlavakesîra.
Kaanya dîkavayamarîna kya' yîme'nya'bi' atîka

kamaru'nare'

⁴³ sai diraginna widina ya' "Sariimi nayaa dinyu'nyila! Nimi yiwe sa' a'mwe pwai kwai a'mwe piri' kiri' nyu'nadika! Dahaa' taayavine wapaaya nya'ne dumaarila!"

6

Naazreti mwaalyara "Jizaazai a'mwe naangei mika," de'.

(Matiyui 13:53-58; Luk 4:16-30)

¹ Sabadaasi sai gannya angebanna wiya'nei wina. Gamirera midinna.

² Gamire angebanna kyimava' Juyaraavire Kwazaakegaa' yima'nakegaa' Lotuangevi buladaa'na yakegaa' wijiwaakina. Sara wijiwaakina yadaanyi' a'mwe kwalaalyara wi'neva atika maru'nareva dinyina "Yagaala daza' a'mwe dai gawi maa'mwaka! Bewai yiwirivanika! Diraginya yiya wi'niwa'do gamire asiraalyi gara yiwaka!"

³ Kaa'madaayai midaaka! Maariyaa' gawaali' midaaka! Jemizalyi Jozizalyi Juthaazalyi Saaimoniji saraavire kwiya'mwei midaaka! Dava nemijiya ganyaabulaanga damwaaihava! Nemiji avaalalyi. A'mwe naangei mika," dinyina ye'. Sara dinyina yeva Jizaazare simunya myawiri kye' sagaa' gaminyina sinna tika davinna.

⁴ Sinna tika wida'daanyi' Jizaazai widina "Pwara Gotiyare wi'nawijiwaakyarine yaya' yilaaya makimaniga'. Kiri' gamire kwaakeba mwaalyaraji kwiya'mweraji

gannya angevi mwaaihasaji sa gamire yaya' mamakilyivaniga'."

⁵ Sara widina yaka angeba saba diraginya ya'ne aane pini kini mya'. Kiri' nalaav+naka pwaina pwaina, piri'na piri'na ata kudathiwaga' tewaanya mwaalina ye'.

⁶ Sara yesa'na dina "A'mwe kwalaalyara nimnyina manyilimwagy+waava!" Sara yesa'na maru'na'na ya'.

Jizaazarera wijiwakamarye!
(Matiyui 10:5-15; Lukɪ 9:1-6)

Sabanne angebanna wijiwakamarina ya'.

⁷ Sara yakegaa' atiraai sivi+yiridaasi pwaraal-yara bina kye' "Nimire yagaalya'na a'mwe pwaraahi pimagina diwila! A'mwe pwaraahi pimagina diwila! A'mwe yuyaihi sana sana jila! Nimire diraginyabwi kyihizaava'muji a'mwe yimaka widivisaraavi wanganapiji yimakeraavi gir+nakeraavi duthaasideihilyi.

⁸ Tusavine gilyivita maayaihi yadisarikananyaihi diwila! Tika wapaaya, gilya', nigwigilyi' mamaapinera!

⁹ Aawa. Kwaari'masivila divaazi'ma'nyila! Baazi'ma'nya piriwaai mabaazi'ma'nipinera! Sare'na yarai diwideihilyira."

¹⁰ Nabaai gamireraavi widina "Angebanna yimavaawapiji anga gave piri+vi dimwaalyila! Wapaaya'na myiri'maranamaripinera! Anga gave saba se wapijavadaasi kaanna diwideihilyi.

¹¹ Anga pibanyara 'A'mweraahi kaajila!' mihiza pwara 'Kirimire yagaalya' wi'naana!' mihiza kwara kamwaalapiji kaanna wiyagaa'

‘Anga girikita'nanyababisaba midaaka! dina yakilyi tiryaa saraaihire sivila warojiya purakirasi'na yakilyi kaanna diwide'na angebanyara kunnyabwi yawipi'dererera. Sare! jalikurakya'nesi.”

12 Gamirera mi'na wi'neva pina pina yiwinadaa'na yeva a'mweraavi widina “Sarimire simunyabwi mudikebwi jawiramaarila!”

13 Sara widina yesagaa' yimaka kwalaal-yaraavi widaasina yeva a'mwe nabalnakeraavi yisiwelivananya' minyaginyangi dingina yeva tewaanya wimwaaihina ye' gamirera.

Jonî Bavitaaziya Yadei bala!

(Matiyui 14:1-12; Lukî 3:19-20; 9:7-9)

14 Yuyaba a'mwera gami yakengi dinyidinya yadivisa'na piba maremwaaidei Erotiyai dara wi'nake! “Sahwai nawi'nya jivanika!” Wi'nake! daresti. Pwara Jizaazarina dinyina “Gami sai Joninyira. Jonî Bavitaaziya Yadei balaka Gotiyai yidikaavaka savina kwaihwaainakei diraginya divaniginya' maaraka tewaanya saza yivanikelyira.”

15 Sara dinyina kye' pwara dine! “Gami sai Yilaajai kigaakuna balyaakelyira.” Dinesavi pwara dinyina “A'mwe sai wi'nawijiwaakadei sinnawi Gotiyari wi'neva a'mweraavi wijiwakyaasarabisalyi.”

16 A'mwe pwara sana sana kadine! Erotiyai widina “Jonî sahwalayira. A'mweri wide ‘A'mwe Jonimi tilinnya' doripuka!’ Kude balakei dahaa' tewaanya mwaali!,” wida!

17 Sare' dare'nesi. Sahwai Erotiyaaza' gya'mwe Pilipimire balaanga' kwala maara'.

18 Sare' dare'nesi. Joni widina "Ja'mwere a'mwe' baa'na ma'mwaana! Sabwina Gotiyare Kiwinyabwi galazekivaimwaa," widina.

19 Sara widina kya' Erotiyaazavi sinna tika wida'daa'nyi Erotiyai Erotiyaazavi yilaaya maryaka yake'na Erotiyai a'mweraavi kudaasa' Jonimi wila marirakina yeva kalavuzangevi wimwaaihina ye'. Joni kalavuzangevi kamwaala' Erotiyaazavi sinna tika kuna wida'daa'nyi "Jonimi tamakima!" dada Erotiyari kuda "Aawa," widina.

20 Sare' dare'nanyi. Sai dina "Joni a'mwe naangelyira. Sahwai yida'maraangei. Tewaanyaburi mwaaidei," daka "Erotiyaaza' naramakadika!" daka Jonimi kalavuzangevi nayaa maremwaaina. Maremwaina yakei Jonimire yagaalya' w'nada simunya kwalaalya yawi'na yada yilaaya ya'.

21 Pigaa' Erotiyaazavinegaa' yima'nakegaa' Erotiyai daka "Niwaa' niminyi nyimaarakegaa' jima'niwaka!" daka gamire widaayadivisaraavi widina "Yarala, dahaa' Kwaaka maremwaaidivisaraji aawilasaraavi maremwaaidivita naangeraji Galili mwaalya naangeraji saraavina tika munne jovirayila dahaa' sagaaka!" Widina kya' Erotiyaaza' dara wanganake' "Dahaa' Jonimire balyagaa' daaka!"

22 Sara kada' tika munne nadaapi Erotiyaazavire garaavaanga' bulaawina yaka kwarama yina. Taaya' kwarama sara kya' Erotiyalyi a'mwerari yilaaya yina. Yilaaya yina

kye' Erotiyai taayav+ widina “ ‘Sare nyijaama! kanyida'gizi gizaav+deiny+ra.

²³ Nebulya' githiwa 'Nim+re gilyiv+ita naange war+!. Gilyiv+ita sa Kingiyainy+reba yune tinnyabanna gizaapaly+deiny+', ” widina.

²⁴ Sara w+dake' walyuna yaka ganaangev+ widina “Nim+ beri'na widijiwana?”

“ ‘Jon+ Bavitaaziya Yadere m+nyaginya' d+nyimaryaama!' sara duthana!”

²⁵ Sara widina kya' yime'nya'bi' taaya sa' yarai bulaaw+na yaka Erotiyari widina “Dara yaw+!manige. Jon+ Bavitaaziya Yadere m+nyaginya' maara'gizi paletiyav+ waka'gizi yarai nyijaama!”

²⁶ W+dakev+ Erotiyai kale naanga wiadaa'ny+ “Nebulya' githiwa,” w+dake'na nabaai tika munne nesara sara wi'nesa'na “ ‘Aala,' nud+w+dika!” daka

²⁷ yime'nya'bi' damer+ w+daasa' “Jon+ Bavitaaziya Yadere m+nyaginya' dalama-ralingipuramaraawa!” W+daasakei walyuna yaka kalavuzangev+ Jon+m+re t+linnya' woripu'na yaka

²⁸ m+nyaginya' paletiyav+ wak+na yaka maku-laabaka taayav+na bulaw+jaava'. Kabulaw+jaava' taaya' ganaangev+na w+jaav+na.

²⁹ Sagaa' Jon+m+rera dara wi'nesa' “We', Jon+ mena davaimwaka!” Deva kaanna w+na yeva k+laakeji' maar+na yeva kaanna makwaweve simaangev+ wak+na ye'.

Jizaazai a'mwe kwala naanga naangeraavi wapaaya wijaava'.

(Matiyui 14:13-21; Lukî 9:10-17; Jonî 6:1-13)

³⁰ Jizaazai wîdasaawakera yagalaaweve ayîna beva gamînyî kumî yuya sara yesa'na nabaai wîjîwaakesa'na wîdîna.

³¹ Wîdîna yesara mwaaidapi kwalaalyara bulawî'nyaagaidîvî' wodaapi pwara bulawî'nyîna yadaapi Jizaazalyî gamîrerajî wapaaya nya'negaa' mwarina.

³² Wapaaya nya'negaa' mwari yake'na gannyaraavi wîdîna “Gaveina a'mwera maayawîna kwawaajî pigaa' kwazaaka dîmwaalyîla!” Sara wîdîna kya' sahwara gavera sipîyavî wîlamwaaidapi pîwî a'mwera maayawîna makuna ya'.

³³ Makuna yadaa'nyî a'mwe kwalaalyara tîna wanganeva “Jizaazai gamîrerari damakuvanîka!” deva anga yuyabanyara aalîbumaangevî kaanyave'na kaanyave'na sahwaraavi wavîlaveva a'mwera maayabanna yî'ma'na ye'.

³⁴ Yî'ma'na yevera aalîbumaangevî mwaaidapi gamî kwaakevakî bwalamwaaina yaka dara wanganake' “Kwala bwa'naanya naange' daaka!” Daka “O, a'mwe dara a'mwe da jîlkyaawarya sipîzipîya yî'dîvaidei maaya yaasîwa'na mwaaihava.” Sara dîna yake'na gamîre kale wiadaa'nyî yagaala kwalaalya gaai wîjîwaakîna yîna ya'.

³⁵ Wîjîwaakîna yîna kya' sawîtirînyaburî gamîrera bîna yeva wîdîna “Sawîsaburî menanyîra.

36 Dava anga mamannyika dava a'mweraavi duthana! 'Davadaasaihi, angeburaji wawinyaba anga mannikabaj wawopiji sariminne wapaaya nya'neihi dinyide dimubyila!'

37 Sara widina kye' sai widina "Sarimi saihi wapaaya dumaarila!" Widina kya' "Nemi gara yaajiwo? Nigwia kwalaalya (200 kinaaya) maraaji kwaji girikula mubaawina yawaaji a'mwe yuyara wapaaya maalika kanipidika!" widina gamirera.

38 "Wapaaya gara gara wari'? Danganamarila!" widina. Sai widina yakera tinna wangana-maryaaweve ayawinna beva widina "Girikula dawaai dawaai da' jawinya pwaraalyi wa'dinyi wangamwona," buthe' gaminyi.

39 Buthina kye' a'mwe sahwaravi widina "Kurivaariyangi yuyaraavi nayaa geva geva jawibwaramwaaihila!"

40 Sara widina kya' piba kumi kwala naanga (100) mwaalina, piba kwala naanga (50) mwaalina, sana sana ye'.

41 Sana sana mwaalina kye' Jizaazai girikula atilya dazaji jawinya pwaraalyi maaraka sigunyavina maranganaka Gotiyarina "Su! Wapaaya danna gimire yaya' makimwa," widaka girikula gunyina gunyina yaka gamireraavina wimaarina a'mwe kwala naanga mwaaidapijiyaraavina yanga wimuja'ne. Nabaai jawinya pwaraai milikina milikina yaka yuyaraavina yanga jaapalawimuda'.

42 Kajaapalawimuda' tika nyina kye' munya yunebanna kwina'

43 pini warina niganakesa warina kya' gamirera maarina yeva jawinya sara niganaketa maarina yeva gilya atiraai sivilyiridaa'nyi pukaalyangi maramihyeku'na ye'.

44 Wapaaya nesamiliikaavidaasara a'mwe gavera (5000) paaivi taawizaniyara mwaaleva nyina ye' wapaaya.

Jizaazai aalyavi a'ba wawoke'nesi.

(Matiyui 14:22-23; Joni 6:15-21)

45 Yime'nya'bi' gannyaraavi widina “Yarala, sipiyavi wilaamwaalapiji angeba Betizaaita aalibunyavi pimagi mannikebanna diwideihilyira. Wodaapiji kwala bwa'naanya davi wididehaa'nanyi ‘Sarinnya angengi diwila!’ Divi nimi wilaabidera.”

46 Sara widakera wina kye' kwala bwa'naanyavi “Tewaanya diwila!” widaka “Gotiyari widima!” daka mugunyangi yilaawina ya'.

47 Yilaawina kya' sawisa' kajinna' gamirera sipiyavi mwaaidapi aalibunyavi tinnyaba sipiya' wila'di'nyi gavei kwaakevaki mwaalina.

48 Mwaalina yakei wanganake! “O, yihuta naange' tivaata'mwake'na nimirera aalyavi yisikari yari yari makwiya yadaapi sipiya' kavena damakuvanika!” Daka yirikunyagaa' aalibunyavi a'ba ga'niguna yaka sipiya' wa'disiyaba “Nimireraavi wawilavima!” yawi'na.

49 Yawi'na yakei aalyavi a'ba ga'niguna yakeri gamirera wanganeva “Ai, gilaayai daaka!” deva “Ewi,” jaka widina.

50 Sare' dare'nanyi. Yuyara gaminyina tinna wanganna yadivi' lika naanga yina. “Ewi,” jaka widina kye' yime'nya'bi' widina “Diraginna dimwaalyila! Niminyira. Lika mipinera!”

51 Sara widina yakei sipiyavi yilamwaaina kya' yihusa' mi. Yihusa' mi kya' gamirera kumi sara tinna banganakulina ye'. Atika naanga maru'na'na ye'.

52 Sare' dare'nesi. Gamire diraginya'na myawiri ye'. Sahwai wapaaya gunyadaa'nyi wapaaya kwalaalya yima'nyina yakevi wanyawalyaadaasara myawiri ye'. Aawa.

*Kwaakeba Ganezaaret Jizaazai
nalaavinakeraavi tewaanya yavada'gala'.*

(Matiyui 14:34-36)

53 Aalibunyavi ga'makuna yeva Kwaaka Ganezaaretina yimavaaweve sipiya' wila marirakina ye'.

54 Marirakina yeva sipiyavidaasara waidavadaapi yime'nya'bi' a'mwe a'mwera gaminyi tinna wanganeva

55 kaanyave'na waweve anga yuya dangi a'mwe nabalnakeraavi maramarina. Sai mwaaidisiyabanna yibinnakeraavi makabina “O sah'banna damwaalika!” deva sah'banna makabina.

56 Sahwai anga naanga kiba anga maalika piba gazabazaba wilyiri'maa'na kya' kumi wapemubya yadivisabanna nabalnakeraavi makabina ye'. Makabina yeva yagaala naanga widina “Nabalnakera gimire kwaabihannyavi maangebaari yime'nyina yipika!” deva widina kye' nabalnakera gamire kwaabihannyavi

yime'nyina yeva yuya sahwara tewaanya mwaalina ye' nabalinakera.

7

Juya sinnawinyaraavirebulyi. (Matiyui 15:1-9)

¹ A'mwe Periziyaraji yagaaikiwijara Jeruzaalemidaasara pwaraji sara gaminyawinna yibwaramakabina yeva

² dara bwanganesa! “Gamire pwara ata girikita'nanyara asangi aalya minyara wapaaya danivanigava!”

³ Sare! dare'nesi. Periziyaraji Juya yuyaraji sara dinyina “Ne sinnyawinyara sara dinike'na nemi sara yaana!” Dinyina yadivi' asangi aalya minyara wapaaya nadivitara mi'.

⁴ Sara wapemubyasiyara kunnya angevi wileva aalya minyevera wapaaya manyi ye'. Ne sinnawinyaraavirebwi kumire simunyangidaasi maalikebwina mi'. Naangebulyi piburaji limwadivi' “Nemire kuryara girikita'nanya nyipidika!” deva kaapivananya maa'gula paletiya aalya yina ye'.

⁵ Sara yadivisara Periziyaraji yagaaikiwijaraji sara yikabina yeva yiwaara'na “Gimirera ‘Ne sinnawinyaraavirebwi yaana!’ majara ata girikita'nanyaji nivaniga'. Ne sinnawinyaraavireburi kaanya myamari-vaniga'. Aawa. Ata giriki'nakera wapaaya nivaniga'. Sabwi be'na yivanigava?”

6 Tɪvi'na yɪwaara'na kye' wɪda' "Aazaayai Gotiyarɪ wɪ'nawɪjɪwaaakadei pɪropetiyai sarɪmɪnyɪna kwaasiyabwi yadɪvɪsaihɪrɪna nayaa dɪnɪkabaabɪsasɪra.

A'mwera nayaa maangi'na nyɪdɪvanɪgasa'
Kumɪre sɪmunyabwi menyaba warɪ'.

7 Gazare yɪlaaya nyɪdɪvanɪgasangi
mu'nyɪvanɪge.

A'mweraavɪrebwi yaasiwa'na wɪjɪwakadaapɪri
'Gotiyarebulyɪra,' yawɪ'na yɪvanɪga'.

Sara dɪnɪkesɪra.

8 Sarɪmɪ Gotiyare yagaakɪwɪnya ya-
galya'ma'manɪgasa' a'mweraavɪrebwi nayaa
lɪmwamanɪga'."

9 Nabaai wɪdɪna "Nawɪ'nyɪna Gotiyare
yagaakɪwɪnya wasɪ'na yadɪvɪ' sarɪnnyabwi
mɪdɪnya'neihi yɪvanɪgasaihɪlyɪra. Be'na
yɪvanɪgava!

10 Sare' dare'nesɪ. Mozɪzai wɪjaa'
'Gɪmaamaangelyɪ gwaangesɪ sayorɪ nayaa
kadɪka dɪvada'galawɪ'nana!' Nabaai 'Pwai
yuyagaa' ganɪmaangerɪna ganaangevɪna bɪrala
yadei yuna balana!'

11 Mozɪzai sara wɪdɪna yaaka kɪrɪ' sarɪmɪ dadɪvɪ'
'Pwai wɪdaza' "Nɪmwai pwai nɪwaa' kɪrɪ' ka-
maaradɪke nɪmɪre Kovaniya' warikengɪra." '
(Kovaniya' yagaala sa' "Gotiyarɪna wɪjaaya'neva
dɪnɪke'.")

12 Sara kudozi 'Kovaniya' mi'na waka'gɪzɪ
gɪmaamaanga pwarɪna gwaanga kɪrɪvɪna
mujaavɪnna!' sarɪmɪ sara dakadɪvɪ' a'mwe sai
navɪka mwaaladelyɪ. Sara yadɪvɪ' 'Nemɪrebura
nemɪre kaimɪraayaraavɪ wɪjɪwakaana!'

13 Sara dadivisa'na 'Gotiyai wijaake' gesira,' yawi'divitabaabisasi. Nabaai avaalyabita kwalaalya sana sana yadivisaihilyira."

Yuya girikita'nanya.

(Matyui 15:10-20)

14 Sagaa' kwala bwa'naanyavi jaka ayina jivwaramaa'na yaka widina "Yuyangihii, nyu'napi simunya nayaa jawirila!

15 Mwasimaginya aane piri' kiri' a'mwe pwarì kulaabozì girika yima'nannei mika. Aawa. Yuya a'mwe sare kusimaginyavidaasa kwalyabozì girika yima'nadengira.

16 A'mwei kadì'nakei nayaa wì'nana!"

17 Kwala bwa'naanyavi yagalya'mavaka angevi wilina yakegaa' gamirera yagaala ke'ba'nanya'na widina.

18 Sara widina kye' widina "Nabaai pwarajì sarimijì sara myawirijìwaava! 'Yuya kamara-nojì mwasimaginya a'mwerì kulaabozì girika yima'nannei mika,' myawirijìwaava!

19 Wapaaya sa simunyavi mulyi yade'nanyi. Aawa. Gamire singwalikeri bwalaawina kyojì lika wirasi'na yadengira." Sara widake' "Tika wapaaya yuya kimaaka mika."

20 Sai widina "A'mwere kusawinyavidaasa' walyaabina kyojì sa' girika yakadesira.

21 Sare' dare'nanyi. A'mweraavire simunyavidaasi yawita kayaa'na naanga yina, gami maridaakunyina, kuka yina, a'mwerì tamakina,

22 a'mwevi ata limwanna, gilyivisangi wabarinna yina, yi sinna tika widaya'nebwi

yina, kwaasi yina, jilikera yadivisabaabi' yina, tiganaarya yina, pwarina kwaasi yagaala dina, birala yina, pihadika yina, yi yaasiwa'yamarya yina yadivisangira.

²³ Kayaa'nanya yuya davura ku-sawinyavidaa'nyi walyaabina, a'mwere simunyavidaa'nyi walyaabina kyoji girika yakina yadengira,” Jizaazai widina ya'.

“Jizaazai diraginaangelyi,” a'mwe' wida'.
(Matiyui 15:21-28)

²⁴ Sabadaasai angeba Taayaa sabannei wina. Anga saba Kwaaka Siriya mannikaba. Sai wina yakei “Aane pwai kwai aane piriri' kiriri' nanyanganadika!” daka angevi kave mwaalina yada lika yulya'di'nyi kiriri' a'mwera dara wangane! “O, dava sahwai damwaalika!” Mi'na kade' lika myulyari yakelyi.

²⁵ Yi'me'nya'b'i taaya' yimaka widevi ganaange! “Sahwai mwaalika,” wi'naka bina yaka gamire sivilyiraaryaba a'mwe sa' bularutawa'na ya'.

²⁶ A'mwe sa' Girikiyagaala dade' Kwaaka Siriya mwaalya Piniziyaraavire' a'mwe sa' naanga yawaara'na “Nyiraavaangavire munyiki yimakeri duthasaawadeigi daaka?”

²⁷ Yawaara'na kya' Jizaazai Juyaraavi wigaimwadei wijawaakiyagaala widina “Sinnawi kaimiraayangina wapaaya wijaavipika! Sare' dare'nesi. Sinnawi jilikeraavina kaimiraayangire wapaaya namarasi'nipidika!” Sa'na widake' sinnawi Juyaraavi wigaimwadelyira.

28 Sara wiđina kya' a'mwe sa' daka "Juya'nyi+ mika. Maave'nyira. Jilika sarabisa'nyi," daka wiđina "Yo, Naangeigi sa'na kaimiraayangire wapepwaka kabwalaraawoji jilikera yi'binyavi dalaangevi mwaalapiji maribwaranipi'derera."

29 "Gimi nyidiwaanyavina ginnya angebanna wawo'gizi taayavi dangadera. Dahaa' yimakai taayavire munyikiđaa'nyi mena wiwaka."

30 A'mwe' wi'naka gannya angebanna wina kya' taaya' yi'binyavi wa'di'nyi dara wanganake' "Yimaka marawinaangi'dei mena dawwalyuwaka!"

Kadikiryai yagaala majai tewaanya yima'na'.

31 Anga Taayaa sabadaasai Saaithoni angeburina yi'mavaawina yaka pina lavita'na yaka Atiraalyaba angeburaavi gi'mavamaryaka aalibunya Galilina yi'ma'na ya'.

32 Yi'ma'na kya' gaminyawinna a'mwe pwara a'mwe kadikiryai taalimabyari jiwaramakabina yeva naanga wiđina "Kadikiryare minyaginyavi ata dithathiwana!"

33 Sara wiđina kye' sahwai kadikiryari sangineba makuna kya' gaveraai mwaaidakilyi Jizaazai gamire kadikikaari asiraai tilavalmwaga'nyina yaka asiri maagwala yinyina yaka kadikiryare taalisari dathakina yaka

34 sigunyayina maranganaka simudingwaimale yaka wiđina Juyaraavire yagaalyavi "Epaata!" Yagaala sa' "Kadika diwaaso!" kadika tewaanya wi'nya'na dinikesi.

³⁵ Wîdîna kya' kadîkîryare kadîka tewaanya wî'nyîna yaka gannya taalîsalyî yagaala tewaanya dîna sagaa'.

³⁶ Kadîkîryai tewaanya mwaaidî'nyî Jizaazai a'mwe pwaraavi wîdîna "Nîmî yîwe'na aane pwari kwari yagaala mudîpînera!" wîda' yagaala naanga. Diragînna sara wîdake sa'na wîdîwîja yesara diragînaanga sara ye'.

³⁷ Pwara wî'neva atîka maru'nareva "Sahwai yuyangî tewaanya yîwakelyîra. Kadîkîryara nayaa wî'nyî'neraavi wîmwaaîhada taalî'mabyara nayaa wîja'neraavi wîmwaaîhadei," dîne'.

8

Jizaazai a'mwe kwala naangeraavi (4000) wapaaya wîjaava'.

(Matîyui 15:32-39)

¹ Yîrîka sangî gamînyawînna kwala naange' yî'bwa'nyîna yeva tîka wapemaayara mwaaidapi Jizaazai gamîreraavîna jaka jîvwaramaaraka wîdîna

² "Kwala bwa'naanya dasî nîmîjî yîrîka daryaaî dari' mwaaidori ya'na dahaa' wapaaya maayaraavîna kale nyîwa'.

³ Kumî mijîka wiadaasî 'Sarînnîya angebanna dîwîla!' wîdîwîja' a'mwe pwara maave keiba mwaalyarajî a'mwe pwarajî tusavî mijîka nabalapîka!"

⁴ Wîdîna yakevî gamîrera yagaala ma'maa'na "Dava a'mwera mamwaalyadîvîsaba aane pwai kwai a'mweraavîne wapaaya gawî maarajîwa!"

5 Sai yidaangana! “Girikula gara gara warika?” Sara kyidaangana! “Ati ata puridaa'nyi pwaraaina.”

6 Sara widina kye! kwala bwa'naanyavi widina “Yuyangihi, kwaakevi dalamwaalyila!” Widina yaka girikula ata puridaa'nyi pwaraalyangi maaraka Gotiyari “Su! Su!” widaka gunyina gunyina yaka a'mwengine wapaaya wijaaya'nera gamireraavi wijaavina kya! sara kwala bwa'naanyavina wijaavina.

7 Mi'na wijaavina yesara jawinya piri'na piri'na wa'disiya wimaarina kye! Gotiyari “Su! Gimire yaya! makimwa,” widaka gamireraavi widina “Jawinya daji a'mweyuraavina yanga dumaarila!”

8 A'mwe yuya maranyina kye! munya yinyina kya! wapaa pini niganakina yeta bwakuna wapaaya pini gilya ati ata puridaa'nyi pukaalyangi maramihe! gamirera.

9 Tika wapaaya neta kwala naanga naanga (4000) mwaalesare. Mwaalesaraavi sai widina “A'mweihi, wapaa mi'na nivanigasaihi, sarannya angebanna diwila!”

10 Sara widina yaka yime'nya'bi! widaasina, gamirerari sipiyavi wilaamwaaina kya! Kwaaka Dalimaanutaneraavi makuna ya!

Periziyara Jizaazar i wide! “A'mwera mwan-ganyadivisa'ja!”

(Matiyui 16:1-4; Luk 12:54-56)

11 Saba Periziya pwara gaminyawinna wilaabina yeva “Gami sari kayaa'nanya'na yaamiji widaana!” yawireva

“Yidakwasanganaana!” deva widina “Gotiyare diraginya! maara'gizi wijiwaainya diraginya! ja! Wanganaade'na Gotiyareigi dingaka?”

12 Sara widina kye' gamire simunyavi kale wiadaa'nyi simudingwaimale yaka widina “Dahaa' mwaaihasara ‘Wijiwaainya diraginya! ja!’ baa'na nyidiwaava! Nebwi yihithivanige. Wijiwaainya diraginya! mwanganyi jideihilyira dahaasaihi. Arikawinyira.”

13 Sara widina yakei kumi saraavi yarai yagalya'mavaka sipiyavi wlamwaaina kya' aalibunyavi pimagina makuna ya'.

Periziyaraji Erotiyalyi saraavire yagaala kayaa'nanya'nesira.

(Matiyui 16:5-12)

14 Gamirera wapaayanna navika yina kye' kumiji sipiyavi girikula gave piri'na wara'.

15 Girikula gave piri'na wa'di'nyiyagaa' gami “Dinyu'nyila! Mala nayaa jiwannyila! Periziyaraavire liwinya pamidakya'nesi Erotiyare liwinya pamidakya'nesi nayaa jawirila!”

16 Widina kya' gamirera dinyina “Wapaaya mamaariwo'na nediwaka.”

17 Dinyina yesa'na Jizaazai yawiraka widina “‘Nemi wapemaayainere’,’ baa'na dimaniga! Kunya' myawirijivaniga! Sidu'maayaihi daa!

18 Tinnakeihi, tinna mwanganyijivaniga! Kadinakeihi, kadika mu'nyijivaniga! Nimi sinnawi ye'na nayaa myawirijivaniga!

19 Sagaa' girikula atina gunyina kye paaivi taawizaniyara mi'na kane' wapaa bwakuna yake

sarimi giya gara garengi maramihe?" Sara widina kya' widina ye' "Atiraai siviyyiridaa'nyi pukaalyangi maramiho."

20 Widina kye' widina "Girikula ati ata puridaa'nyi pwaraalyangi po taawizaniyara kanawa'daa' wapaaya pininna yunebanne giya gara gara maramihawa'daa'?" Sara widina kya' widina "Ati ata puridaa'nyi pukaalyanginyi."

21 Widina yesaraavi widina ya' "Sa'na dahaa' kunya kuna myawirijivaniga'?"

Anga Betizaaita tinnyaraai yuyaraai tibinyai wangana'.

22 Kumi Anga Betizaaitana kyi'mave' gaminyawinna a'mwe pwara a'mwe tibinyari jiwaramakuna yeva naanga widina "A'mwe dari ata dithathiwade'nanyi!"

23 Sara widina kye' Jizaazai tibinyare asavi maaraka angebadaasi jiwaramakuna yaka gamire tinnyaraari maagwala wopina yaka gamire tinnyaraari ata dathiwagaka yidaanganna "Piri' kiri' dangamwaana?"

24 Yidaanganna kya' maranganamaryaka widina "A'mweraavi dahawangamanige? Yisara kaanya yamaryivanikabaaibi' sawaraavi wanganaaswana."

25 Sagaa' widakere tinnyaraari ata ayina dathiwanna kya' a'mwei diraginna kwangana' gamire tinna tewaanya kyima'na' yuyangi tinna nayaa wangana'.

26 Nayaa wangadaa'nyi sai widaasina ya' "Ginnya angevina diwona! Anga dava ayina mulaawinnera!"

Pitai Jizaazar'ina nayaa wida'.

(Mat'yui 16:13-20; Lukî 9:18-21)

²⁷ Jizaazalyî gamîrerari sara Sizaariya Pilipaai angeburaavina gi'mavamarina yadaapi gamîreraavi widîna "Niminyina a'mwera aaihwala nyidivanigava?"

²⁸ Gamîrera widîna "Giminyina 'Jonî aalyavi bavitaaziya yakei dikaavakela,' pwara dîmaniga'. 'Ne Yîlaajai dikaavakela,' pwara dîmaniga'. 'Gotiyari wi'nawijiwakyaaka pwai dikaavakela,' pwara dîmaniga'."

²⁹ Sara widîna kye' yîwaara'na "Sahwaihi, niminyina baariva dîmanigataihilaka?"

"Kiraazitiyaiginyira. Gotiyai
githasaabakeiginyira."

³⁰ Pitai sara widîna kya' sai "Naange' yihithiwa. Sa'na niminyina aane pwari kirivi mudipinera!" widîna ya'.

Jizaazai gannya daanga wivinya'na gannya balya'na wida'.

(Mat'yui 16:21-28; Lukî 9:22-27)

³¹ Sai gamîreraavi gaai wijiwaakina "A'mweraavine Kaimiraayainyi daanga naanga nyivinadeinyira. Juyaraavire a'mwe naangeraji sipizipiya Gotiyarina mubithika yira'divita naangeraji Kiwijaraji sara niminyina 'A'mwe kayaa'nanaangelyira,' dinapiri nyiramakipi'deinyira. Kanyiramakapi yirika daryaaî dari' kanyavilavoji baryainyi ayina dikaavideinyira."

³² Yagaala sa' ku'maayaba aangyagaala widîna kya' Pitai sahwarî sangyinebanna

jîvwaramakwoka maanga wîdîna “Naangeigi, sabwi myawî'dîna!”

33 Sara maanga wîdîna kya' gînyîma'naka gamîreraavî tîna wanganaka Pitarî maanga wîdîna “Saataanîgi, nîmînyî dusîmagîna dîwona! Gotiyai sara yawî'manîkebura myawîrivanîgi. Aawa. A'mwera sara yawî'manîgasabura yawî'manîgînya'nanyî.”

34 A'mwe kwala bwa'naanyavîjî gamîreraavîjî jaka wîjîvwaramaa'na kya' gamînyawîna bîna kye' wîdîna “A'mwe kîrî' a'mwe kwai 'Jîzaazareinyî. Mîdînîma!' yawîraja' 'Nîmînyîne'na myawî'munera!' dathe'na pwara 'A'mwerî yîta yovîhîrarannîkevîri tamakaana!' kadapîri sai 'Jîzaazarîna balîdeinyîra,' dozî nîmîrebwî yawî'deî nyîmîdînadelyîra.

35 Sare' dare'nesî. Yî a'mwe pwai lîka yojî 'Nanyîramakîpîka! Nîmîre gaalya' padaihasamaa'nîma! Jîzaazarî wasî'nîdeinyîra,' dozî navîka mwaalajai gamîre kuryai kayaaka yadelyîra. Kîrî' pwai 'Jîzaazarîna nyîramakîpî'deinyîra. Nîmîre gaalya' kayaaka yana!' yawî'da nîmîre yagaala tewaanya'na yawîraja' yuyagaa' gamîre kuryai nayaa padaihasamaa'delyîra.

36 Sare' dare'nesî. A'mwe pwai Kwaaka davakî gîlyîvîsajî yuyajî sangî maarojî manyîlîmwagari kyojî gamîre kuryai yîwîna yadelyî. Sa' tewaanya' daaka! Arîkewînyîra!

37 Sare' dare'nesî. A'mwere kuryai kayaaka yîma'nyîna kyojî gannya kuryarîna a'mwe sai Gotîyarî berîsî mubathelaka! Aawa.

38 Sare' dare'nesi. Kwaaka davaki mwaaidivisara Gotiyarina navika yadivi' a'mwe' a'mwe pwarì ata limwana yade'bisarera. Kayaa'nanaangera niminyinaji nimore yagaalya'naji sangina 'Wagila nanevwa'nadika! Sahwari wasi'nima!' deva yivanigasara. Nabaai divi A'mweraavine Kaimiraayai Ganimaangere byaanna diraginya' kamaaroji Gotiyare mamaayara ejeliya tewaanyaraji kwalaabori wagila wivwa'nivanikeraavina gami sari wagila wivwa'nadelyira. Saraavi wasi'nadelyira."

9

Jizaazare kilaakeji' yaaka naanga byaannakeji' yima'na'.

(Matiyui 17:1-13; Luki 9:28-36)

1 Sai a'mweraavi widina "Nebwi yihithiwa. Dava mwaaihasarajiya pwara divi kwaihwaainakera kuna mwaalapiji mabalyi yapiji dara wangabi'de' 'Ai, Gotiyai diraginna damaremwaalika!' Sara wangabi'dehaa'nanyi."

2 Yirika daryaai daryaai daryaai kwavilava! Jizaazai Pitalyi Jemizalyi Joniji saraavi maarina kya' mugunya naangevi yilaawina yilaawina yeva gavera daavina kye' pwara mamwaalyi kye' gamire kilaakeji' nawinyaji' gavinyaji' kyalingina' kumi tinna wanganna.

3 Tinna wanganna yadaapiji gannya kwaabihannya yaaka naange' yima'nakevi Kwaakevaki mwaaidivisara yaaka sa' sara myalinginyadesira.

⁴ Yaaka naange' kyima'na' Ne sinnawinyaraai Yilaajalyi Mozizalyi saraai Gotiyarebadaasaraai yima'naabina, daavina yagila Jizaazari widina kyagi dinyina.

⁵ Sara dinyina kye' gamirera tinna wanganna yeva Pitai Jizaazari yaasiwa' widina "Nejiwaakadinyagii, nemi' dava mwaiho' tewaanyasira. Siminya dawaai dasangi yari'laana! Piri' giminyine', piri' Mozizarine', piri' Yilaajarine' yari'laana!"

⁶ Sare' dare'nesi. Pitai "Nimi' gara dijiwa?" dina yakelyi. Nabaai sare' dare'nesi. Sahwalyi gamireraalyi sara lika naanga yesa'nanyi.

⁷ Sagaa' yiraaya' kuminyi gidala yirina kya' yiraayavidaasi maanguraaya' "Dathai nyibwaalivaangelyi. Yilaaya yadi kurya wikadinyalyira. Dahwar' nayaa du'nyila!"

⁸ Yagaala sa' w'neva yime'nyabi' dara wanganesa' "Ai, aane pwai kwari tinna mwanganyi, Jizaazai gavei nemiji' damwaalika!"

⁹ Silyaridaa'nyi gamirerari waidavadaapi sai naanga widina "Wangamwaasa'na a'mweraavi mudipinera! Divi A'mweraavine Kaimiraayainyi bala'muri bainikeraayawidaa'nyi dikaa'mujahaa'na yi sagaa' duzideihilyira."

¹⁰ Sara widina kya' kumi sara a'mweraavi yagaala sa' mujiwaaki. Mujiwaakya'nera dinyina " 'Bala'muri bainikeraayawidaa'nyi ayina dikaavideinyira,' nediwake'na be yagaalavaka?"

¹¹ Sara dinyina yeva gaminyi yiwaara'na "Ya-

gaaik+wijara nedivaniga' 'Sinnaw+ Ne Yilaajai kaboz+ divi Kiraaz+iyai bathelyira.' Savine'na baa'na nedivaniga'?"

12 Sara wi'naka widina "Yo, dinike' sinnaw+ Yilaajai bozi yuyangi yavada'galadelyira. Nabaai A'mweraav+ne Kaim+raayainy+na dinike' 'Yi Kwaaka davaki daanga naanga wiv+inadelyira. Yi yilaaya mamari y+pi'delyira.' Sare' gara y+da'n+ikevaka?"

13 Kir+! n+mi sainy+ y+h+thivanige. Yilaajai mi'na bakelyira. Mi'na baker+ kayaa'nanaangenna wiesa' Got+yare bukuya' sara din+kabaab+isa'nes+ra."

Kaimalei y+maka wider+ Jizaazai nayaa yavada'gala'.

(Mat+yui 17:14-21; Luki 9:37-43)

14 Gam+re pwaraavi wij+ima'naaweve dara wanganesa' "Kwala bwa'naanya naange' kum+nyaba mwaaidapi Yagaaik+wijaraji nem+reraji maanga dath+man+igava!"

15 Dina kye' y+me'nya'bi' bwa'naanya yuya' gam+ny+ tinna wangesagaa' at+ka maru'nareva gam+nyaw+inna kaanyave'na beva "Naangeigi," widina.

16 Sara widina kye' sai y+waara'na "Maanga be'na di+man+igataih+laka?"

17 Y+waara'na kya' bwa'naanyav+daa'nya pwai widina "Neji+waakad+nyaigi ny+baal+vaangei y+maka widei yagaala majari+ gi+m+nyaw+inna makabiwa.

18 Y+makei galal+mwanna yada kaimaler+ kwaakev+na bwalamarak+na yadehaa' gam+re

maangevî maagwaitala yîma'nada maangerîka maagîlaku'gîlakuta yadaasi gamîre kîlaaka yuneba diragînya yîma'nade sagaa'. 'Yîmakei duthaasîla!' dena gîmîreraavî kudîwa sahwara yîna yîna kyîwaa' yîmakei kuna widelyîra. Myî yîpînere."

19 Sara widîna kya' sai ma'maa'na "Dahaasaihi, malîmwagyadîvîsaihi sarîmînyaba mwaala'mujî yîhîzîwaaka'mujî sarîmînyîne'na taanga kuna gathîngaa' maarîdeinyaka! Kaimale dai nîmînyawînna dîmakabyîla!"

20 Mi'na widîna kya' makabîna kye' yîmakei Jizaazarî wanganaka yîme'nyabî' kaimalerî yîkîlaaka galyîma'na kya' kwaakewî bwala'na yaka gînyîwannyî gînyîwannya yîna kya' gamîre maangevî maagwaitala yîma'nyîna.

21 Sara yîma'nyîna kya' sai ganîmaangerî yîwaa'na "Sa' garegaa' yîma'nakavaka?" Yîwaa'na kya' ganîmaangei widîna "Kaimale maalîkegaa' sara yîma'na'.

22 Kyîma'na' yîmakei kwalaalyagaa' kaimalerîna 'Tamakîma!' daka dîkevî marasî'na yada avaala kwai aalyavî marapaihîna yadei. Sare' kirî' 'Nîmîre diragînya' darîka!' dîza' naarîmînyîna kale kagyozî nehîgaimwana!"

23 Sara widîna kya' Jizaazai widîna " 'Nîmîre diragînya' darîka!' dîza' pwai nayaa nyîmîdîmanîkei sahwai yuya yannelyîra."

24 Diragînna sara kuda' yîme'nyabî' ganîmaangai yarai widîna "Gîmîdîmanîgevwi maalîka warîke'na naanga yîma'nyane' dînyîgaimwana!"

25 Jizaazai dara wanganake' "O, kwala

bwa'naanya' kaanyave'na jikabivanigava!" Daka yimakeri maanga widina "Yimakeigi kadikiryagi yagaala majaigi kaimaleri be'na wimwaahina! Gamire munyikidaasi yunakaanna diwona! Ayina nabwidika!"

²⁶ Sara widina kya' yimakei jaka dina yaka kaimaleri naanga galyima'na yaka bwalyuna. Sara bwalyuna kya' kaimalei baryaibi' warina kya' pwara dinyina "Mena baimwaka."

²⁷ Sara dinyina kye' Jizaazai gamire asavi yiri'bwa'na kya' kaimalei sagaa' tewaanya dikaa'na yaka daavina ya'.

²⁸ Angevi mi'na wlamwaaina kya' gamiji gamirerari gavera mwaaidapi gamirera yidaanganna "Sahwaina yimakeri widasaanne! gara yawaaji widasaannekajinyira?"

²⁹ Yidaanganna kye' sai widina "Yimaka darina Gotiyari tibariyagaala kadapiri bwalyawodelyira. Aane piri' kiri'na mika!"

*Jizaazare balyagaa'na pigasaai wida!
(Matiyui 17:22-23; Luki 9:43-45)*

³⁰ Sabadaa'nyara Kwaaka Galili wavila'na. Wavila'na yadaapi "A'mwera nanyangabithika!" daka sai kave wina.

³¹ Sare' dare'nanyi. "Nimireraavi wijjwaakima!" daka widina "A'mweraavine Kaimiraayainyi pwai ninyi yikamaangeraavina kwibwaridaakwoji yikamaangera kanyiramakapiri balideinyira. Mi'na bala'muji yirika daryaai diki ayina dikaavideinyira."

32 Sara widina kya' yagaala sa'na myawiryadivi' nabaai, yidaanganya'na lika yina ye'.

“A'mwe naangei bewalaka?”

(Matiyui 18:1-5; Luk 9:46-48)

33 Angaba Kaapaniyamina yimaveva angevi ayina kabulamwaale' sai gamireraavi yawaara'na “Tusavi wivanigasaihi be yagaala dīmanigatavaka?”

34 Widina kya' sahwara yagaala majara mwaalina. Sare' dare'nesi. Tusavi dinyina “Nemijyayi a'mwe naangei aaihwalaka? Nimi dingaka?”

35 Majara mwaalina kye' walamwaalaka gamire atiraai sivi'yiridaa'nyi pwaraalyaraavi jivwaramaa'na yaka widina “Pwai gannya simunyavi ‘Sinnawinyainyi yima'nima!’ yawirajai sai yuyaraavine aayaangei yima'nana! Yuya saraavina widaayadei yima'nana! Sai yawi'na ‘Nimi maalikeinyira. Yuyaraavire widaayideinyi yima'nima!’ doziya sahwai naangei yima'nadelyira Gotiyarina.”

36 Widina yaka kaimiraayamili' maaraka tinnyaba mwaaidapiyaba gannya timunyavi maramuji'na yaka widina

37 “Pwai kwai niminyina yawiroji kaimiraaya daibisamili' maaraja' niminyi nyimaaradeinyira. Nabaai sai sara nyimaarajai niminyi gaveinyi nyimaaradeinyi mi'. Aawa. Nimaamaangei nyidasaabakeriji maaradelyira.”

Neyamwelyireva.

(Luk 9:49-50)

38 Jonî widîna, “Nejîwaakadînyaigi, nemî dara wangamwo! ‘A’mwei gimîre yaya! wîdaka yîmakeraavi a’mweraavîre munyîkaavîdaasi dathasîvanaabîka!’ Sai nemîjîyai mî!. Savîdaasi nemî wîdîwo ‘Sabwi minnera maaveigi!’ ”

39 Mi’na wîdîna kya! Jîzaazai wîdîna “ ‘Sabwi minnera!’ mudîpînera! Sare! dare’nesî. Aane pwai kwai nîmîre yaya! wîdozî diragînaange! yojî maalîkegaa! nîmînyîna kayaa’na wîdathei mî!.

40 Sare! dare’nesî. A’mwe nemîre yîkamaangei mamwaalyîkei nemînyînelyî.

41 Sare! dare’nesî. Pwai sarîmînyîna ‘Kîraazîtiyarerî mijîka’na aalya tîka nya’ne! wîjaavîma!’ dozîya’na nîmînyîna yîhîzaavajai. Yî sahwarîna nebwi yîhîthîwa. Gotîyai gamînyîne tîvikîta tewaanya mujaayî yadei mîka! Arîkewî.”

Kayaa’nanaangebwi a’mweraavi kayaa yadevulyîra.

(Matîyui 18:6-9; Lukî 17:1-2)

42 “Pwai kaimîraaya damîlî’bîsamîlî’ nîmînyî nyîlîmwaga’demîlî’ pwarebwi kujaawa! wala’mwaake! kayaa’nanaangesîra. A’mwei sara yajarîna Gotîyarî sinna tîka naanga wîdavadelyîra. Sînnawî sawai pwarebwi mujaayadî’nyîyagaa! a’mwe dari maapijî kwajî sîla naange! gamîre tîlînniyavî tîmupîjî kwajî aalîbunyavî wîvaihîna kyîpîke’na wabana yînîkesîra.”

43 Jîzaazai yawîraka “Kayaa’nanya nyîpîdîka! Dîkevî nulaawîpîka!” daka ke’ba’na wîdîna

“Nabaai ginnya asasi kayaa'nanyabwi yiji kwaji ginnya asavi woripu'na'gi ata gavesiyaigi Gotiyarebanna jilaawade'na tewaanyasira.

⁴⁴ Kayaa'nanyabwi yiji kwaji asawaalyiyaigi yaayebanna gazagaasagaa' Dike' yida'nivanikevina dulaawade'na kayaa'nanaangesira.

⁴⁵ Nabaai ginnya siviylasi kayaa'nanyabwi yiji kwaji woripu'na'gi sivila gavesiyaigi Gotiyarebanna dulaawade'na tewaanyasira.

⁴⁶ Kayaa'nanyabwi yiji kwaji siviylawaalyiyaigi Dikevina dulaawade'na kayaa'nanaangesira.

⁴⁷ Nabaai ginnya tinnyalyi kayaa'nanyabwi yiji kwaji ginnya tinnyai galajiwamwanna'gizi tinna gavelyiyaigi Gotiyai maremwaidevanna dulaawade'na tewaanyasira. Kayaa'nanyabwi yiji kwaji tinnyaraalyiyaigi Dikevina dulaawade'na kayaa'nanaangesira.

⁴⁸ Dika savi yuyagaa' gumilika gilaayangitika nadivisa mabalyi yipi'dengira. Dika myigaakuri yadesira.

⁴⁹ Sare' dare'nesi. A'mwera Gotiyare yagaalya' wi'nadivisara tewaanna mwaajib'dere. Kayaa'nanyabwi dike'bisabwi kyima'noj Gotiyare diraginyabwi kujaavoji diraginya tewaanna mwaajib'dere.

⁵⁰ Saalya' nawinyasira. Sa'na saalya' giringwita yima'noj nawinya ayina gara yadevaka? Aawa. Nawinya mima'nyi yadesira. 'Nemi saala giringwisa'bisaina nyima'naadika!' dapiji nayaa dimwaalyidera. Gazaizai gaminyi pwarina kwaamu'na mwaalana!”

10

*A'mwera a'mwamarya wasi'divisabwina
wijiwaaka' Jizaazai.*

(Matiyui 19:1-12; Luk# 16:18)

¹ Sabadaasai sai Kwaaka Juthiya wavilavaka Aalya Jothani ga'mavaka kwaaka saba kamwaala' gaminyawi kwala bwa'naanya mwaaidapi wijiwaakadevaabi' aya kini nayaa wijiwaakina.

² Sara wijiwaakina yadaa'nyi Periziya pwara wilaabeva "Sahwai kayaa'nanya' yana!" deva yaamiji yawaara'na "Pwai gannya balaangevi wasi'naja' sabwi tewaanna yadevwi daaka? Kayaa'na yadevwi daaka?"

³ Sara yawaara'na kye' widina

⁴ "Savine' Ne Mozizai sirinimaangeraavi yagaala berivi wijaihilaka?" Sahwara widina "Mozizai da' dini' 'A'mwe pwai yawiroji "Ninnya a'mwe' wasi'nima!" dozi pikariyikwiavi yagaala sa' yidavoji gannya balaange' yunakunyavi wasi'nadelyira.' "

⁵ Sara widina kye' Jizaazai widina "Sarimire simunyangi galarilavimwaaihinyina yawaata sabwina kiwinya sa' Ne Mozizai dinikesira.

⁶ Dinike' sinnawi sagaa' Gotiyai yuya wakyaakegaa' Gotiyare yagaala dini' 'Gotiyai kwalyalyi gannya balyasi yavikaryaake'na

⁷ a'mwe pwai ganimaangelyi ganaangesi sawari yagalya'makuna yoji a'mwe' maarina yoji

⁸ gamire a'mwesi mwaalina yakiriyagaa' kiyo! aalyawaalyi. Kilaaka gaveji!

yîma'nikadewaalyî.' Sa' dînike'na a'mwe pwalyî a'mwe pîrîsî sawaai mîka. Aawa. Kîlaaka gavejîsiyawaalyî.

⁹ Sarevîdaa'nyî Gotiyai kîlaaka gavejîsiyawaarî wakake'na kwalaangei gannya balaangevî mwasi'nannesîra.”

¹⁰ Salyî gamîrerari angevî bulamwaaina kye' gamîrera a'mwevî wasî'nya'na yîwaara'na.

¹¹ Savîne' yîwaara'na kye' wîdîna “Pwai kwai gannya balaangevî wasî'nojî a'mwe mudîkevi kamaarojî Gotiyai wanganojî ‘Gannya balaanga ayavîna a'mwe mudîkevi ata lîmwamwakelyîra,’ dathelyîra Gotiyai.

¹² Nabaai a'mwe' gannya kwalaangerî byenîda'makwalyuna yaja' a'mwe pwarî kamaa'nojî ‘Gannya kwalaangerîna a'mwe mudîkerî ata lîmwamwakesîra,’ dathelyîra Gotiyai.”

Jizaazai kaimîraayangîna tewaanna wîda'!
(Matîyui 19:13-15; Lukî 18:15-17)

¹³ A'mweyura “Sahwai ata yîmetavana!” deva gamînyawîna kunnya kaimîraayaraavi makabîna kye' gamîrera maanga wîdîna “Mipînera!”

¹⁴ Jizaazai dara wanganake' “Ai, nîmîrera maanga duthîvanîgava!” Daka sîna tîka kudava' wîdîna “Nîmînyawîna kaimîraaya bîpîka! Kumînyîna kaanya maribînera! Sare' dare'nesî. Gotiyai maremwaaideva pwara kaimîraaya darabîsara Gotiyarî lîmwadîvîsara mwaaibî'dengîra.

15 Nebwi yihiithiwa. Pwai kwai 'Gotiyareba mwaalima!' dazai 'Kaimiraayai Gotiyari yilaaya yadeibisainyi yima'niwijainyi,' maji kyori Gotiyare maremwaaide nawi'nyaba mulaabi yadelyira. Arikawinyira."

16 Sara widaka kaimiraaya gannya asawaalyi muji'na yaka ata yimeta'na yaka "Gotiyai giminyi tewaanna gyathelyira," widina widina ya'.

*A'mwei gilyivita naangejiyarinesi.
(Matiyui 19:16-30; Luki 18:18-30)*

17 Angebadaasai kwaakaanya wodaa'nyi a'mwei gaminyawinna kaanyave'na wawaka "Naangelyira," daka kwadaai gilaka yiwaara'na "Nejiwaakadinya tewaanyaigi, 'Gotiyare yuyagaa' yuyagaa'ne gaalyabwi maarima!' da'muji gara yideinyaka?"

18 Sara widina kya' Jizaazai widina " 'Tewaanyaigi,' nyidiwaanya' baa'na nyidiwaa? Pwara kayaa'nanyara, Gotiyai gavei tewaanyalyira.

19 Yagaaikwinya dara yawi'mwaa. A'mwe maramakinna! A'mwengi ata malimwadinna! Kuka minna! Kwaasi yagaala majalukurakinna! Kwaasiya ya'gizi pwarengi kuka mamaa'dinna! Gimaamaangelyi gwaangesi gizikaja sara jithengira. Kirimire yaya' dimakila!"

20 A'mwei sare wi'naka widina "Nejiwaakadinyaigi, yagaaikwinya sangi kawe'nyagaa'daa'nyi sara mididinyainyi."

21 Widina kya' Jizaazai wanganaka gaminyina wivu'nakeri widina "Gave pirina ghainivani'.

Wawa'gizi ginnya gilyivisa yaasa'gizi nigwia maara'gizi gilyivi'maayaraavi yanga wijaava'gizi Gotiyareba warade gilyivisaj'yaigi nyimidi'naadeiginyira.”

²² Sara widake'na a'mwere kale wiadaa'nyi “Aala,” dina jikurya yaka kavena wina ya'. Sare' dare'nesi. Gamire gilyivita kwalaalya kininnakelyi.

²³ Mi'na wina kya' Jizaazai a'mweraavi maranganaka gamireraavi widina “Gilyivik'raya naangejiyara wawinya naanga yina yina yipijara kwaji Gotiyai maremwaaideva tewaanyaba kupidikerera.”

²⁴ Sara widina kya' gamirera atika maru'nakulina. Atika maru'nakulina kye' Jizaazai ayina ma'maa'na “Kaimiraayaihi, Gotiyai maremwaaidévanna wilya'na wawinya naangesira.

²⁵ Langa lilitavalo'ma'nikeriki jilikyaawarya kaameliyai wilaawade'na wawinya maalikesi. Gotiyai maremwaaideva gilyivita naangejiyai wilaawade'na wawinya naangesira.”

²⁶ Sara kuda' atika maru'na'muluna yeva dinyina “Gotiyarebanna aai yilaawadevanaka? Aari padaihasamaaradelaka?”

²⁷ Dinyina kye' Jizaazai kuminyi tinna wanganaka widina “A'mwera yapi mulaawi yipi'dera. Aawa. Gotiya gavei kyoji wilaawipi'derera. Sare' dare'nesi. Gotiyai yuyanna yadelyira.”

²⁸ Pitai sari gaai widina “Yithaa, nemi yuyangi ya'mawakona gimidinaabiho.”

29 Sara wiðina kya' Jizaazai wiðina “Nebwi yihiþiþiwa. Aane pwai kwai niþiniþine'naji yagaala tewaanya'naji gannya ange' gya'mwera gya'mwe ganaange' ganimaangei gannya kaimiraaya gannya wawinya ya'mawakoji

30 kiri' dahaasagaa' anga kwalaalya, gya'mwe kwala naange, ganaanga kwalaalya, kaimiraaya kwala naanga naanga, wawinya naangeva' mamaari yadei midaaka! Kwaaka davaki naanga naanga maarade kiri' niþiniþine'na pwara taanginya wijaavipi'de divi yima'nadehaa' Gotiyare nawinyaba yuyagaa' yuyagaa'ne gaalyabwi maaradelyira.

31 Sa'na Kwaaka davaki pwarina 'A'mwe sinnawinyalyira,' diþanigasarina Gotiyareba 'O, aayaangemiliki,' diþipi'delyira. Yi pwarina 'A'mwe aayaangemiliki,' diþanigasarina Gotiyareba 'O, sinnawinyalyira,' diþipi'delyira. Yi kwalaalyaraavina sara diþipi'derera.”

Dahasaai dahaa' Jizaazai gannya baryagaa'na wida'.

(Matiyui 20:17-19; Lukî 18:31-34)

32 Jeruzaaleþinera tusavi kaanya widawadaapi Jizaazai kaanya wodaa'nyi pwara “Sabannei lika myiwaka,” deva atika maru'nakulina yeva miðinna yesara lika yina. Lika yina kye' sai gamireraavi þiba wiþmwaaihaka gaminyina yima'nya'ne'na wiðina

33 “Yiþhaanyi! Jeruzaaleþineina yimanaawigo. Saba A'mweraavine

Kaim#raayainyi maarapi sip#zip#iya Got#yar#na y#ra'd#iv#ita naangeraji yagaaik#w#jaraji saraavi kany#mar#mwaaihori a'mwe sara n#m#ny#na 'Sai baladely#ra,' j#davapi anga naanga pimag#nyaraavi (Rom# mwaalyaraavi) ny#mar#mwaaih#p#derera.

³⁴ Kany#mar#mwaaihapi birala nyap#ri maagwala nyopwas#n#p#ri lannaka w#lyabaaly# mala ny#ramap#ri ny#ramak#p#deiny#. Kabala'muri y#r#ka daryaai dari# kwav#lavoji kwaihwaainakeiny# ay#na d#kaav#deiny#ra.”

Jem#zaly# Jon#ji# kidaraai Jizaazar# y#daanganagi.

(Mat#yui 20:20-28)

³⁵ Sagaa# Jem#zaly# Jon#ji# kidaraai Sevathiyare gawaal#l# kwaraai saryaw#nna w#laabah#la wid#na “Nej#waaakad#nyaigi, g#thakade# naar#m#ny#ne#na sara j#theinaaly#ra. Sara yaw#l#mwoi.”

³⁶ Mi#na wid#na kyagi wid#na “Kir#m#ny#na baari# y#j#w#?” wid#na ya#.

³⁷ “Naar#m#ny#na tewaanyaba maremwaala#g#zi# g#m#re byaannakevi 'Pwaigi# aangasavi pwaigi# kwanaamevi namwaaly#ta nawi#nyawaari# kwalamwaalak#ly# nemi# maremwalaadeinera,' sara neh#ithana!”

³⁸ Sa# wid#na kyagi Jizaazai wid#na “Ny#daangaman#g#ly# myaw#riwaai. Daanga ny#v#nade#na kaapiya sa# d#nyideraaihi daaka? Nabaai daanga kih#v#noji d#rag#nyaraaihi daa#? N#m#re kilaaka yuyaj#k# daanga ny#v#nade#na n#m#re bav#taaz#ya# ny#ma#nades#reva nabaai

kirimire kilaaka yuyajiki daanga kihivinoji kirimi diraginna dimwaalyideraahi daaka?”

39 Sara wida kya wida “Naarimi diraginyainaai wikira. Wi'na yakaneinaalyi.” Jizaazai wida “Kaapiyavi aalya nide' savi aalya dinyideraaihilyi. Niminyi bavitaazyaya' nya'de' kiriminyi yihwaradesi.

40 Sare kiri' nimire aangasaviji nimire kwanaameviji walamwaalya'na ninnya wawinya' daaka! Aawa. Gotiyai yawiroji gami sahwai namwaalyita nawi'nyawaai yovirawakyaakewaarina pwaraari wimwaaihadeliyira.”

41 Gamirera pwara atiraalyara sadaraai wida'ilya' wi'nyina kye' Jemizalyi Joniji sadaraarina sinna tika wida'vina.

42 Sinna tika wida'daa'ny'i Jizaazai wiji'vwaramaa'na “Yuyahi, kaajila!” wida'na “Ajimya yuyangiyaraavirebwi yawi'mwaa'. Ajimya yuyangiyaraavi maremwaaidivisara 'Nemi a'mwe naangeinera,' didivi' a'mweraavi marulawakina yadivi' mwaaiha'. Nabaai kumire a'mwe naangera kuminyi diraginna yadivisarera.

43 Sabwi mipinera! Sarimjiyayi pwai 'Nimi a'mwe naangeinyi yima'nima!' yawiroji pwaraavi widaayoji a'mwe naangei yima'nadelyira.

44 Pwai kwai 'Pwaraavine sinnawinyainyi yima'nima!' yawiroji pwaraavire yaasiwa'wawinyai yima'noji sinnawinyai yima'nadelyira.

45 Sare' dare'nesi. Sahwainyi A'mweraavine

Kaimîraayainyî pwara nyîdaayîpî'de'na mabyîwa. Aawa. Pwaraavîre wîdaayîde'na bîweinyî. A'mweraavîre kayaa'nanyabwina mubya'na kabala'mujî a'mwera tewaanna mwaaibî'de'na bîweinyî. Kwalaalyaraavîna a'mwaminîgwiainyîra.”

Jizaazai tîbînyarî tewaanya yavada'gala'.

(Matîyui 20:29-34; Lukî 18:35-43)

⁴⁶ Anga Jeriko yî'mavaaweve sahwalyî gamîrerari kwala bwa'naanyasî sara Jeriko ya'ma'daapi Baatîmayaazai, Tîmayaazare gawaalî, tîbînyai a'mweraavî “Nîgwia nyîjaama! Tîbînyainyî,” dadei tu'maangebaari mwaalina.

⁴⁷ Mwaalina yaka dara wî'nake! “Jizaazai Naazaretî mwaalyai daaka!” Daka jaka wîdîna “Ne Devîtîmîreigî, Jizaazai, nîmînyî kale dînyîgaimwana!”

⁴⁸ Sara jaka wîdîna kya! pwara maanga wîdîna “Madîna! Kave dîmwaala!” Maanga wîdîna kye! kirî! jaka naanga naanga wîdîna “Ne Devîtîmîreigî, nîmînyî kale dînyîgaimwana!”

⁴⁹ Jizaazai sara wî'naka mudaraka pwaraavî wîdîna “Nîmînyawîna duzîvwaramaarila!” Mî'na wîdîna kya! sahwara tîbînyarî jaka jîvwaramaa'na, wîdîna “Wikîra. Jîvaimwana! Gîzîvwaramaa'mwake! yarai dîthîkaaka!”

⁵⁰ Wîdîna kye! gannya yîvîta tapalasi'naka yarai dikwosi'nadaavaka Jizaazaryawîna wîlaabîna.

⁵¹ Wîlaabîna kya! Jizaazai wîdîna “Gîmînyîna berî! yîjîwa? Gara yawî'mwaa?” Tîbînyai

widina “Naangeigi (Ravuni), ‘Nimi tinna wanganima!’ dena githiwa.”

⁵² Sara widina kya! Jizaazai widina “Niminyi nyilimwamwaanya'na gamire tinnyaraai tewaanya yana! Kaanya diwona!” Sara widina kya! gamire tinnyaraai tewaanya kyima'na! tusavi Jizaazai kwawa! a'mwei midinna ya!.

11

Anga Jeruzaalemi Jizaazai tewaanna wilaawa!
(Matyui 21:1-11; Luk 19:28-40; Jon 12:12-19)

¹ Jeruzaalemi adaihisaba Anga Bepaaza Anga Betaani mannikeba Mugunya Wolivi yi'ma'na kye! gamire pwaraari widaasina

² “Angeba sakyiri! sakyaba wilaawakilyi yime'nya'b! dogiya naanga saadwinyai wila pwekinikeri wanganakilyi dogiyari a'mwe aane pwai kwai milamwaalyari wila yaarakilyi niminyawinna dimakabyila!

³ A'mwe pwai kwai ‘Sabwi baa'na yivanigi?’ yihithaza! dara duzila! ‘Naangei sarina kugainivanikira. Nabaai mi'na kyoji sagaa! yime'nya'b! dogiyari ayina maryasaabathelyi.’”

⁴ Mi'na widaasina kya! saraai kaanya wawagila adusavi dogiya naanga saanyai tikuryaba mwasawi wila pwekinikeri wanganagila wila yaarina.

⁵ Wila yaarina kyagi saba pwara daavina yeva widina “Baari! yivanigi? Diwinya sari baa'na yaa'manigi?”

⁶ Sara wiðina kye' saraai Jizaazai wiðake' ku-dahi “Wikîra. Diðmakwila!”

⁷ Sara wiðina kye' Jizaazaryawinna dogiya saanyari makabina kyagi yivita mararaapaleva dogiyari yilakina kye' sahwai yivisiikaavi a'ba yilamwaaina.

⁸ Sara yilamwaaina kya' a'mwe kwalaalyara “Sahwai naangeri yilaaya yaana!” dinyina yeva kunnya yivisa tusavi marakina kye' pwara “Tinna tewaanya wanganya'nengi,” deva taanya kiwa'nake peda'na yeva tusavi nayaa marakina.

⁹ Nayaa marakina kye' sai yilamwaaidinyi sinnawinyaraji diviyaraji sara yilaaya yeva jaka wiðanganna “Naangeigi, Gotiyai padaihasamaarana! Gotiyai Naangei giþhasaabake'na gaminyine yayavi biwaanyaiginyi tewaanna gizaavana!

¹⁰ Sinnawi Ne Deviti tewaanya nemaremwalyaakabaabi! Gotiyarina dinemaremwaala! Maremwaala savi Gotiyai tewaanna wiana! Menya ke'mwewinyai giðinevadaihasamaaka! Su! Su!”

¹¹ Sai Anga Jeruzaalemi wilaawina yaka Gotiyare angevi wilaawaka saba yuyangi tinna wangamabina yaka sagaa' sawisirina mena yima'nakegaa' Betaani anga maalikevina gamirera atirai sivi yiridaa'nyi pwaraalyaraji kaanna wina ya'.

Jizaazai yita pihiyari wiða'!

(Matiyui 21:18-19)

¹² Mwanyavi dikaaveva Betaanidaasara wodaapi gaminyi mijika wina.

13 Mijika wina yadaa'nyɪ keiba yita pihiyai kiwa'nakeri tinna wanganaka “Yisɪlya daaka?” daka kaanna wina. Yisaryabanna baka sagaa' dara wanganake! “O, kiwata gave daaka?” Sare! dare'nesi. Yita yuya yisɪla mya miyadɪ'nyɪ.

14 Daka yisari widina “Yisimaayaigi yuyaga' aane pwai kwai gimire yisɪla manyi gyatheiginyi.” Sara widadaasi gamirera wi'nyina ye!

Jizaazai Gotiyare Angevina wawa'.

(Matiyui 21:12-17; Luki 19:45-48; Joni 2:13-22)

15 Jeruzaalemɪna yi'mavaawina kye! Gotiyare angevi saba Jizaazai wilaabina yaka yaasaraavi maririgalaasina ya!. Nigwia yanga yinya'neraavire yi'binyangiji kwaamirya yaasadi'v+saraavire namwaalisangiji marapuratawasina yaka

16 a'mweraavi widina “Gotiyare anga davi aane pwaigi kwaigi gilyivisa mamwa'nalota'dinnera!”

17 Sara widina yaka wijiwaakina “Gotiyare bukuya! dinike! ‘Gotiyai dara widake'na daaka! “Nimire ange! tibariyagaala ja'nesira. A'mwe ajimya yuyangiyara angevi wilaabapi tibariyagaala nyidipi'desira.” Sara dinike! pwara wilaabina kyiwaa! sahwaravire nigwia mwagi'nya'neba daa dava!”

18 Sipizipiya Gotiyarina mubithika yira'divita naangeraji yagaaikwijaraji sara wi'nadivi! Juya naangera gaminyina “Balade'na gara yaadeinaavaka?” dinyina. Sare! dare'nesi. Sahwarina lika naanga

yesa'nanyi. Sare' dare'nesi. Kwala bwa'naanya' wijiwaakiyagaalya'na atika maru'na'muluna ye'.

¹⁹ Sara dinyina kye' sawisa' kajinna' angebadaa'nyi salyi gamireraji bwalaawina ye'.

Yita pihiyai wijiwaakya'nesira.

(Matiyui 21:20-22)

²⁰ Mwanyavi tusavi kaanya wodaapi yita pihya' pwipulyaji taanyaji yuya yawaka balake' tinna wanganna.

²¹ Tinna wanganna kye' Pitai mi'na yawiraka sari widina “Nejiwaakyaigi, dangana! Yita pihiyai yagaala diraginya' widiwa'dinyai mena baimwaka.”

²² Widina kya' kuminyi widina “Gotiyari dilimwagarila!

²³ Nebwi yihithiwa. Pwai mugunya' widozi 'Mugunyaigi dikaava'gizi saalaalyavi divaihina!' Nabaai gamire simunyavi 'Mugunyai sara yadelyira,' kalimwagaroji Gotiyai gaminyina sara yadelyira.

²⁴ Savine'na yihithiwa. Tibariyagaala duthathe ginnya simunyavi 'Gotiyai mena sara nyijaawa,' kada'gizi gizaavadengira.

²⁵ Tibariyagaalya'na daava'gizi yawi'diza' 'Ai, pwai kwai kayaa'na nyiwaka! Sinna tika nyida'mwa,' sagaa' 'Gamire kayaa'nanya' mi'na marasi'niwa,' jawika! Nabaai Gimaamaangei Sigungyavi mwaalikei gimire kayaa'nanya marasi'nade'na sara ja!

²⁶ Kiri' pwara kayaa'na gyiwaasa'na kumire yiwetawakya mamarasi'nyi yija', yi gimire

yiwetawakyanna Gimaamaangei Sigunyavi mwaalikei mamarasi'nyi yadelyira.”

Jizaazare d+rag+nya' aai w+jaava'?
(Mat+yui 21:23-27; Luk+ 20:1-8)

²⁷ Jeruzaalem+na ay+na w+laab+na. Mi'na w+laab+na kye' sahwai Got+yare angev+ kaanya bulayamaryadaa'nyi gam+nyaw+na sip+zip+ya Got+yari+na y+ra'd+iv+ta naangeraji yagaai+k+w+jaraji a'mwe naangeraji w+laabeva

²⁸ w+d+na “Sa be d+rag+nya yawaaih+nyavaka? Yawaaih+nya'na sa ya'neig+nyi d+rag+nya' aai g+zaavakas+yaka?”

²⁹ Jizaazai sahwaraavi w+d+na “Yagaala p+ri+ y+hiwaarav+ma! Sav+ kaja'nany+dapi sara yawaaihe'ne d+rag+nya' y+hi+z+w+ak+d+einy+ra.

³⁰ Jon+ aalya bav+taaz+yabwina Sigunyav+daasi Got+yai duz+w+akaka? Kwaakevaki a'mwera duz+w+akeva? D+za'nany+j+la!”

³¹ Sara w+d+na kya' yagaala d+ny+na “ ‘Sigunyav+daas+ra,’ kudawaaji ‘Jon+ n+im+ny+na w+j+w+aka!. Baa'na mu'nyetaih+laka!’ nanedath+ka!

³² Sare' k+ri+ ‘A'mweraav+daasasi,’ madaanna! Kwala bwa'naanya' nanerab+ka! Sahwaraav+na l+ka yadaa mwaaiho.” Sare' dare'nesi. A'mwe yuyara yawi'na “Nebulyasi. Jon+ Got+yari w+na'neji+w+akadelyi.”

³³ Sara d+ny+na yeva Jizaazari ma'maa'na “Sa'na myaw+rivan+go.” Jizaazai w+d+na “Nabaai many+j+van+gasa'na n+im+ yawaaihe'ne d+rag+nya'na m+hi+z+w+ak+w+nesi.”

12

*Waainiwi la wawinyavi yadivisaraavinesira.
(Matiyui 21:33-46; Luk 20:9-19)*

¹ Sahwai ke'ba'na wida'na "A'mwe pwai wawinyavi giraipizila maarya'na burinna ya'. Sai kurita yavikaryaka giraipiwila buridaka kavininnyavi giraipizila mwa'mwagikya'ne' likaka anga maaliki' wawinyaba banganarya'ni' madina. Mi'na madina yaka pwaraavi wida' 'Nimire wawinya' maremwaalapi giraipizila pin'i yihizaavide.' Sahwara wawinya' kamaremwaale' a'mwe sai kwaaka pibanna kaanna wina.

² Kaanna wina kya' giraipizila mya yakegaa' sai gannya wawinyawinna widaayaderi wawinyavine sila pininna widaasina.

³ A'mwe widaasina yakei kaanna wina kya' wawinya' maremwaaidivisara widaayade sari galalimwanna yeva mala wirameva ayina wawinya' gyakwaryawinna simaayari widaasina.

⁴ Sara widaasina kye' gyakwai widaayade pwari widaasina kya' gamire m'nyaginyavi kayaaka yeva birala yina.

⁵ Sara kye' widaayade pwari widaasina kya' sari mena tamakeva widaayade pwaraavi widaasakeraavi pwaraavi mala tamina yeva pwaraavi mena tamakina ye'.

⁶ Sara kye' wawinya' gyakware pwai gawaalivaangei yilaaya wimaryadei kuna mwaala'. Ganimaangei daka 'Nyibwaalivaangerina tewaanna yawipi'derera,' daka widaasina.

7 Widaasîna kya' widavadaa'nyî wawînya' maremwaaidîvîsara tîna wanganeva dîne! 'Sai gawaalî' dîvi ganîmaangere yuya maaradelyîra. Yarala, tamakawaajî gamîre wawînya' namaaradî'de'na maraadeinera.'

8 Sara dînyîna yeva galalîmwanna yeva tamakîna yeva gîraipîziwawînyavîdaa'nyî marasî'na ye'.

9 Gîraipîwawînyavî naangei beri' yadelaka? Sahwai wîlaabozî a'mwe saraavî kayaaka wigalakojî a'mwe pwaraavî 'Sarîmî nîmîre wawînya' dîmaremwaalyideihîlyîra,' wîdathelyî.

10 Gotîyai dînîke' pîkarîyîkwia tîna mwan-ganyî yadîvîsa' daaka?" wîdîna ya'. Wîdîna yaka sahwai yawî'na "Sîlaangeinyîra," yawîraka wîdîna "Dara dînîke'

'Anga madîvîsara sîlaangerî wanganeva "Kayaa'nanyai," dîneva marasî'na yesai Simîjamaanga nawî'nyai yîma'nyîna ya'.

11 Gotîyare sara wakîna yake'

Tîna wanganona "Tewaanya'," dîno.'
Gotîyare bukuya' sara dînîkesî."

12 Juya naangera dara wangane! "O, nemînyîna ke'ba'nanya' duthîwaka!" Deve'na "Jîzaazarî wîla yîrakaana!" dîneva kwala bwa'naanyavîna lîka yeva gamînyawî yagalya'mavaawîna ye'.

Taakîzyagaalya'nesîra.

(Matîyui 22:15-22; Lukî 20:20-26)

13 A'mwe naanga sara Perîzya pwarajî Erotîyare pwarajî saraavî widaasîna "Jîzaazai

kayaa'na wĩdathe'na dĩwila! 'Kayaa'na kudozi kalavuzavi wĩmwaihaana!' dapiri dũwila!"

14 Sara wĩdaasĩna yesara kaanna bĩna yeva wĩdĩna "Nejiwaakadĩnyaigi, 'Nebulya' dade' midaaka!' gyawi'mwo. A'mwe aane pwai kwai gimĩnyĩna dĩvanike'na lika myĩvanigi. Sare' dare'nesi. A'mweraavire sĩnna gavevi tĩnna mwanganyadĩnyaigĩnyĩ. Aawa. A'mwe naangeraaviji a'mweraaviji avaaĩna wĩdadi Gotiyarebwi gavebwi nayaa wijiwaakadĩnyaigĩnyĩra. Romi maremwaaidei Sizaari taakiziya wijaaya'na nemire yagaakĩwĩnya beri' dĩnikavaka? Tewaanya' daaka? Aawa daaka? Taakiziya wijaavaadeina daaka? Mujavaanneina daaka?"

15 Sara wĩdesara kwaasi yagaala wĩdesaraavĩna yawĩraka wĩdĩna " 'Sahwai kayaa'nanyabwi yana!' yawĩreva yaamiji baa'na nyĩdĩwaava! Mone' tĩnna wanganya'neinyĩ dĩnyĩmaryaama!"

16 Wĩdĩna kya' mi'na makabĩna kye' wĩdĩna "Pikizaaya dasi pikarya daji aaihwarengaka?"

17 "Maremwaaidei Sizaarengĩra," wĩde' sah-wara. Sara wĩdĩna kye' Jizaazai wĩdĩna "Sizaari Sizaare ayĩna duzaayĩla! Gotiyari Gotiyare ayĩna duzaayĩla!" Sara wĩdĩna kya' gamĩnyĩna "Nawĩ'nyabwina dadele!" dĩnyĩna ye'.

*Baryara ayĩna kwaihwainakera dĩaaya'nesi.
(Matĩyui 22:23-33; Lukĩ 20:27-40)*

18 A'mwe Sazuziyara, "A'mwera kabalapi yuna madĩkaayi yipi'dera," yawĩresarajiyaa pwara gamĩnyawĩnna beva yĩwaara'na

19 “Nejîwaakadînyaigi, Ne Mozîzai nedînike! ‘A'mwe pwai kware gya'mwei balajai kaimîraavîmaayai a'mwevî bwasi'kwoja' a'mwei a'mwe savi maaroji kaimîraaya maryawakînna, yaya' baryarîne' wîdîna yadengîra.’

20 Sa'na dînike! a'mwe ata purîdaasi pwaraalyadaraka mwaale!. Kamwaale' sîraangai a'mwevî maaraka kaimîraavîmaayai gamîre sîvigwa'jikerînei kunei bala!.

21 Kabala' dîviyai a'mwe savi maaraka kaimîraavîmaayai bala!. Kabala' dîviya pwai avaina ya!.

22 Sana sana yuyara ata purîdaasi pwaraalyadaraka a'mwe savi maareva kaimîraavîmaayadaraka bale!. Kabale' aayagaa' a'mwe sa' bala!.

23 Dîkaasagaa' sahwaravî kyidîkaavoji a'mwe gaware! mwaaladevaka? Sare' dare'nesî. Ata purîdaasi daraalyara yuya sadaraka balaanga sa' maaresa'nanyi.”

24 Sara yîwaara'na kye! Jizaazai wîdîna “Sarîmîre sîmunya kayaa'na yawî'manîga!. Gotiyare bukuyasi Gotiyare dîragînyasi myawîrivanîgasavi kayaa'na yawî'manîgasa'na midaaka!

25 Sare' dare'nesî. Baryara dîkaapi'dehaa' a'mwera a'mwengi mamarina, a'mwe a'mweraavi mamaa'nyi yîpî'dengi. Aawa. Sîgunyavi balaangengi mamaaryadîvîsara mamaayara mwaaihatabaibîsarera.

26 Nabaai baryara dîkaapi'de'na Ne Mozîzai yîdayaake' yîsî' dîka nyaake' yagaalyavi mwanganyîjeva! Yîsîkîdaasi Gotiyai Mozîzari

wijaa! 'Dahaa! Eviraamimire Gotiyainyi. Dahaa! Aazakimire Gotiyainyi. Dahaa! Jaikopimire Gotiyainyi.'

²⁷ Mozizai sara yidayaake! a'mwera baleva Gotiyareba mwaaihasa'na Gotiyai widina 'Kumire Gotiyainyi.' A'mwera yawi'na 'O, a'mwe bainikera.' Kiri! Gotiyai yawi'na 'Niminyine'na gaala mwaaihasara.' Sarimire yagaala kwaasi yagaalyasira," widina ya!.

Yagaaikwinya naange'nesira.

(Matiyui 22:34-40; Lukî 10:25-28)

²⁸ Yagaaikwija pwai baka dinyina yesa! wi'naka dara wanganake! "Sahwai nayaa duthivanika!" Daka yawaara'na "Yagaaikwinya kwalaalya wari! Yagaaikwinya aaya sinnawinya! berivaka?"

²⁹ Jizaazai ja'nawidina "Yagaaikwinya sinnawinya! dara dinike! 'Yizireliyahi du'nyi! Naangei nemire Gotiyai Naanga gave pwainanyalyira.

³⁰ Naangei gimire Gotiyarina naanga givu'nana! Gimire simunya yuyaviji gimire kurya naangeinaji gimire yawita yuyangiji, gimire diraginya yuyangiji Gotiyarina naanga givu'nana!'

³¹ Yagaaikwinya aya kiri! dara dinike! 'Gimi saigi giminyina kale gyivanike! a'mwe gimire angeba mwaalikerina sara kale gyana! Yagaaikwinya dawaai naangewaalyira. Yagaaikwinya aane piri! kiri! yuya sawaari wavila'manika piri! mi!."

32 Sara wiđina kya' Yagaaiƙiwijai wiđina “Nejiwaakadiɗyaigi, tewaanya diwaana. Nayaa diwaa ‘Gami gave pwainanyalyi. Gotiya aane pwai kwai mamwaalyi.’

33 Gaminyina simunya yuyasi, munyi' yuyisi, yawita yuyasi, diraginya yuyaji, naanga nevu'nade'na tewaanyasira. Nabaai neminyina kale neyivanike' a'mwe nemire angeba mwaalikerna kale sara neyana! Sa' tewaanyasira. Sawaai naangewaalyira. Gotiyarine sipizipiya bulimakaawoya yuyara dika nasi'na yadeji yuya yanga wimaarina yadaanyaji sa maalikengira.”

34 Sara wiđina kya' Jizaazai dara wanganake' “Gami sai tewaanya dathivanika!” Daka wiđina “Gotiyai maremwaaideva maavewi mamwaalyigi.” Sara wiđina kya' a'mwe aane pwai kwai myawiramaari “Nimi lika myivanige. Yagaala pini yiwaaravideinyira,” myawiramaari ya'.

*“Kiraazitiyai aihwalaka?” Jizaazai wida!
(Matiyui 22:41-46; Luk 20:41-44)*

35 Gotiyare Angevi Jizaazai wijiwaakakei wiđina “ ‘Kiraazitiyai, Gotiyai widasaabathei Ne Devitimi Gawaalikira,’ Yagaaiƙiwijara sara be'na wiđivanigava?

36 Gotiyare Kuryari Deviti sahwai pikarya yidayaa'

‘Nemire Naangei nimore Naangeri wida'

“Naarimi yuyaraavi maremwaalakadeinaalyi.

Nimire aangasabanna dimwaaideiginyi.

Gimîre sîvilyîraarî yîkamaangeraavî
marulawakîdehaa'nanyî.” ’

³⁷ Devitî sahwai Kîraazîtiyarîna ‘Naangelyîra,’
sara dînikê'na gamîre gawaalîvaangei gara
mwaalîka!” Sara wîdîna kya' kwala bwa'naanya
wî'neva yîlaaya ye'.

Yagaaikîwîjaraavîrebwi.

(Matîyui 23:1-36; Lukî 11:37-54; 20:45-47)

³⁸ Sara wîjîwaakîna “Yagaaikîwîja
pwaraavîrebwi mipînera! Mala nayaa
jîwannyîla! Kumî sara yîlaayabwi ‘A'mwera
yawîpîka! “Sara sîdu'nakera mwaaihava!” ’
deva yîvîta gaala saamînya' marabwaayeva
kaanya yamaryîvanîgasabwi. Mubyabanna
a'mwera ‘Naangeigî. Tewaanyaigî,’
wîdîvanîgasabwi.

³⁹ Lotuangevî naangeraavîre namwaalyîsangî
mwaaimanîgasabwi. Tîka munnegaa'
nawî'nyaba gaveba nîvanîgasabwi. Sabwina
yîlaaya marivanîga'.

⁴⁰ Sara yîvanîgasara yaanyîwaakengîre
angengî kuka yuna maa'manîgasara. A'mwera
‘Kumî sara tewaanyarera,’ yawîrya'nera
tîbarîyagaala naanga kwaasi wîdîvanîga'. Sara
yîvanîgasaraavî Gotîyai naanna jîdavadera
daanga naanga wîvînaderera,” wîdîna ya'.

Yaanyîwaake' Gotîyarî nîgwîa wîjaava'.

(Lukî 21:1-4)

⁴¹ Gotîyare angevî nîgwîa wakya'neba aya kîba
Jîzaazai mwaalaka a'mwera nîgwîa wakesangî
tînna wanganna. Tînna wangadaa'nyî a'mwera
gîlyîvîta naangejîyara nîgwîa naanga kwake'

⁴² yaanyîwaake' gilyîvî'maaya' baka nigwia maalîkikaai wakîna.

⁴³ Sara wakîna kya' sai gamîreraavî jîvwaramaa'na yaka wîdîna “Nyu'nyîla! Nebwi yîhîthîwa. Yaanyîwaaka gilyîvî'maaya da' Gotîyarîna naanga wîjaawaka. Pwara maalî'na wîjawaava.

⁴⁴ Sare' dare'nesî. Sahwara nigwia naange wakîwaasa Gotîyai wanganaka nabaai nigwia naanga naanga kumîre angengî kuna warîke wanganaka dîvanî' ‘Yanga maalîkesîra.’ A'mwe' nigwia maalîkikaai wakîwakevî Gotîyai wanganaka dara wangamwake' ‘Ai, a'mwe sa' wîgainîwake' gannya yuya dakîwaka! Nigwia pînî wapaaya mubya'na mwarijîka!’ Daka dîvanî' ‘Yanga naangesîra.’ ”

13

Gotîyare ange' kayaaka yînya'ne'na wîdake'nesî.

(Matîyui 24:1-2; Lukî 21:5-6)

¹ Sai Gotîyare angevî bwalyodaa'nyî gamîre pwai wîdîna “Nejîwaakadînyaigî, dangana! Sila anga tewaanya sangî dangana!”

² Jîzaazai wîdîna “Anga tewaanya dangî mwanganyîjîvanîgîna? Silaanga a'ba yîla'dî'nyîya' kunewî mwari yadesî. Arîkewî. Yuya wo'dalayîwînasîpî'dengî.”

Daangegaa'nesîra.

(Matîyui 24:3-14; Lukî 21:7-19)

³ Dîvi sagaa' Mugunya Wolivî sai mwaaidî'nyî Gotîyare Ange' pîhîrî mannadîsî wangadaa'nyî

a'mwera mamwaalyaba Pitalyî Jemîzalyî Jonijî Edîruryalyî sara yîwaara'na

4 “Dînedana! Dîwaanya sa' Gotiyare angevîna gathîhaa' yîma'nadevaka? ‘Jizaazai sara nedake' yarai yîma'naabazî!’ be wîjîwaainya' wanganawaajî yawîraadevaka?”

5 Mi'na yîwaara'na kye' Jizaazai gaai widîna “Sarîmî mala nayaa jîwannyîla! Pwai kwai kwaasî yagaala nayîhîthathîka!

6 A'mwe kwalaalyara nîmînyîne yaya' maarapîjî widîpî'dera ‘Nîmî sahwainyîra. Kîraazîtyainyîra.’ Sara kadapîjî a'mwe kwalaalyara ‘Nebulyasîra,’ dapi kumînyî a'mwe kwaasîyaraavî mîdîbî'derera.

7 Nabaai malyangînajî malyangîne yîhukyagaalyangînajî wî'napîjî yawîta kwalaalya mipînera! Aawa. Sa yîma'nanne'na kîrî' Kwaakevakî aaya' yarai yade' mî'.

8 Sare' dare'nesî. Anga naanga pimagînyara anga naanga pimagînya pwarajî mala bwa'nîpî'derera. A'mwe naanga kingîya pwarera a'mwe naangai kingîya pwarerari mala bwa'nîpî'derera. Kwalaalyaba wînînya yadengîra. Mîjîka naanga yîma'nadengîra. Yuya yuya sa yîbwasînapi dîvidaasî kayaa'nanya yîma'nadehaakîra.

9 Kayaa'nanyara kayaaka nayîhîgaibî'de'na nayaa jawîrîla sarîmî saihi! Pwara sarîmînyî wîla yîrakapîjî kaajolîyaraavî yîhîmaarîpî'dere. Lotuangengî yîhîrabî'deihîlyî. Nîmînyîna Ga'maanîyaraavîjî a'mwe naangeraavî kingîyaraavîjî kihîmwangapîjî sarîmî yagaala

tewaanya' nebulya'na dîzalıkurakyide'nanyi!

¹⁰ Gotiyai yawırake'na a'mwe ajîmya yuyangiyara gazabazaba mwaaihasaraavî Gotiyare yagaala tewaanya' sinnawî kujîwaakapîjî dîvi aaya'na yîma'nadehaakîra.

¹¹ Wîla yîhirapîjî kotiya yadîvîta angevîna yîhîmarîmwaaihya'nera kihîmakabapîjî sarîmî yawîta kwalaalya mipînera! 'Nîmî gara wîdîdeinyaka?' myawîpînera! Aawana. Sagaa' Gotiyai yagaalya' sara kyîhîzaavojî dathaza' sara duzideihîlyîra. Sare' dare'nesî. Sagaa' sarîmî duzideihî mîka. Aawa. Kurya Tewaanyai sara wîdathelyîra.

¹² A'mwe pwai dîna 'Nya'mwerî tamakîpî'de'nanyi,' dozî gya'mwerî kotiya yadîvîsabanna wîmarîmwaaihadelyî. Nabaai ganîmaanga pwai gannya kaimîraayari wîmarîmwaaihadelyî. Kaimîraaya pwara kuvînîmaangeyuraavî kotiyabanna makuna yîpî'de yuya baibî'dengîra.

¹³ Nîmîre yayavîna yîhyawî'dîvî' saihîrîna a'mwe yuyaraavî sinna tîka wîdavaderera. Kîrî' a'mwe pwai nîmînyîna dîragîna daavajari aayagaa' gannya barya'negaa' Gotiyai padaihasamaaradelyîra.”

Kayaa'nanaange' kayaaka yîgaide'nesî.

(Matîyui 24:15-28; Luki 21:20-24)

¹⁴ Yagaala da' yîdavîde'na nayaa jawîrila! Sahwai wîdîna “Kayaa'nanaangei kayaaka yîgaidei saba madaayî yajava kadaavojî danganyideihîlyî.” Pîkarya savî wangana'gîzî Jîzaazare yagaala sa' jawîramaaka! “Daa'dîsî

Juthiya mwaalyara mugunyangina yarai likaanya wipika!

15 A'mwe pwai namwaalikwaasavi mwaalojiyai 'Angevi gilyivita kini wilamaarima!' majai yarai likaanya wina yana!

16 A'mwe pwai wawinya yivanikei gannya angevina yivita maarya'nei ayina mabannelyi.

17 Dazagaasagaa', we', a'mwe kaimiraavimunnakenge! We', aamunya wijaavanigave sagaake!

18 'Burike' nabwalaradika! Yirilya' nanedathika!' dapiji tibariyagaala duzila!

19 Sare' dare'nesi. Sagaa'na a'mweraavi daanga naanga wivinadehaakira. Daanga naanga nevinaja sagaa' kayaa'nanyagaakira. Sinnawi Gotiyai wakyaakegaasi kigaasi dahaa' kigaasi wila divi kigaasi daanga sabwi aawano. Arikewi.

20 'Yirika sa daanga naangegaa' yesimavadima!' Gotiyai yagaala sara maji yaja' a'mwe yuya kilaa'nake mamwaalyi yipi'dengira. Aawa. ' "Nimire dahilakiwera nabaibithika!" dena nimi yesimavadima!' Gotiyai dina ya'.

21 Sagaa' pwai kwai githaza' 'Dangana! Dava Kiraazitiyai mwaali', nabaai githaza' 'Dangana! Keiba mwaali', sarimi mu'nipinera!

22 Divi kwaasi kwaasi Kiraazitiyara, Gotiyari wi'nawijiwaakadivita kwaasi kwaasiyara kumi sara kwaasi yawiradidivi' wilaabapiji dapiji 'Gotiyai dahilakakera yawipi'de' dingaka? Kwaasi yagaala wi'nipika! Kayaa'na yipika! wijiwaainyaji atika maru'nataji kwaasi yipi'derera.

23 Sara yîpî'de'na sarîmî saihi tewaanna nayaa dîvaihanaryîla! Mala nayaa jîwannyîla! Dîvi yuya sa yîma'nyîna yadengîna sinnawî sagaa' yîhîthîvanîge.

*“A'mweraavîne Kaimîraayainyî
walaabîdeinyî,” wîdake'nesî.
(Matîyui 24:29-31; Lukî 21:25-28)*

24 Sare' kirî' sagaa' daanga naanga wîvînade sasa' tîvi'na kyojî yîrîka sangî nyîlyai mujî kyojî jîhînya yîma'nyîna, nabaai lawei mujî yadelyî.

25 Sîgunyavîdaasi sîlingaamînyarîka pîrî' bwala'na, pîrî' bwala'na, sîgunyavî dîragînya warîkevî wînînya naange'na yîma'nadesî.

26 Wînînya kyojî A'mweraavîne Kaimîraayai yîraayavî dîragînya naange', tewaanya naange', byaanna naange' wa'dozîyavî kwalaabozi wangabî'delyîra.

27 Sahwai ejelîyaraavî wîdaasîna ‘Nîmîre dahîlakengî Kwaakevakî yuneba pimagi pimagi akyamwidaa'nyî akyamwidaa'nyî kwala dalamari'bwaraawîla!’ wîdasaabîna yadelyîra.”

*Aayagaa'na yîta wîjîwaakya'nesîra.
(Matîyui 24:32-35; Lukî 21:29-33)*

28 “Yîta pîhîya wanganapîjî ke'ba'nanya sa' jawîrîla! Pîhîtaanyavî wîvya naanga kyojî sedala pwa'nyîna yojîyagaa' sarîmî yawî'dîvî' ‘Pîhîya' lî'mwa'. Nyîlyagaa' aya kîgaa' yîma'nadehaakî.’

29 Sara yawî'dîvîtabaabi' sarîmî dîwe sangî yîpî'dengî wanganapîjî dara jawîrîla! ‘Gamî mî'na yarai walaabathei. Tîkuryavî daavî!’

30 Nebulya'na yihithiwa. A'mwe sagaa' mwaalyara kuna myimanigwiadapi yuya diwe sa yima'nadehaa'nanyi.

31 Sigunyasî Kwaakevasî savakaai divi sagaa' kiwawoji kirî' nîmîre yagaalya' yîwawode' mî'. Waragothesîra.”

Aayagaa'na yuyara myawîryarera.

(Matîyui 24:36-44; Lukî 17:26-30,34-36)

32 “Yîrîka walaabide sagaa'na aane pwai kwai yawîradehaa' mî'. Ejeliyara Gotîyareba mwaaihasara myawîrivanîga'. Gotîyarî Gawaalîvaangai myawîrivanî'. Nîmwai gavei yawîmanî'.

33 Sarîmî mala nayaa jîwannyîla! Sare' dare'nesî. ‘Sagaa' gathîhaa' yîma'nade' dîngaka?’ myawîrivanîgo. Sare'na divaihanaryîla!

34 A'mwe daibîsainyîra. A'mwe sai pîwînnei gannya wawînyangî wîdaayadîvisaraavî maramwaaîhîna kumîre wawînya'na, pwai gannya wawînya wîjîwaakîna, pwai gannya wawînya wîjîwaakîna sana sana yaka tîkuryaba mwaaidei damerî wîdîna ‘Nayaa divaihana!’ wîdîwakelyî. Sahîbaaibî' yîhithîma!

35 ‘Sarevîdaa'nyî nîmîreihi, nabaai nayaa divaihanaryîla!’ Sare' dare'nesî. Angevîne naangerîna yawî'na ‘Gamî gathîngaa' bathei dînga!’ myawîrivanîgo. ‘Sawîsavî bathei dîngaka? Kalawawegaa' bathei dîngaka? Yîrîkunyagaa' bathei dîngaka? Yîrîke byaaka gaai yadaaworiyagaa' bathei dîngaka? Nemi myawîrivanîgo,’ dapi nayaa divaihanaryîla!

36 'Nimi yime'nyabi' yima'naaba'muji yarai walaabide'na se wa'dapi nayihwangamudi'!

37 Nabaai nimireraji kayaa'na nabaibithika! dena yihithivanige sa'na a'mweraavi widivanige 'Nayaa divaihanaryila!' ” widina ya' Jizaazai.

14

“Jizaazai balana!” desa'nesi.

(Matiyui 26:1-5; Luk 22:1-2; Joni 11:45-53)

1 “Sawita daryaai kajinnoji tika Pari'ma'munne'naji tika munne Girikula liwinya pamidakina myade'naji naadengira,” Juyara dinyina. Sara dinyina kye' sagaa' sip+zipiya Gotiyarina mubithika yira'divita naangeraji Juyaraavire Yagaaik+wijaraji dinyina “Nemi lika gavabi' yulyarawaaji wila yirawaaji tamakaade'na sahwaris?” dinyina ye'.

2 Sare' dare'nesi. Sahwara dina “Tika munne sagaa' a'mwera mala nanerabika! Sagaa' sarina mwaalana!”

A'mwe' Jizaazaris wabatirinya winya'ne' dinga'.

(Matiyui 26:6-13; Joni 12:1-8)

3 Sai Anga Betaani mwaalaka Saaimoni Samatanakere angevi wilina wapaaya nya'nei walyamwaaidisi a'mwe' wilaabina. A'mwe' simaa'gula nawinya wabatirinya naathi tirinya winya'ne mubya naange yake' yinikesi makulaabina. Makulaabina yaka simaa'gulya' tingina yaka gamire minyaginyavi dingina ya'.

4 Tivi'na dingingina kya' pwara simunyangi sinna tika wida'daa'nyi dinyina “Wabatirinya winya'ne' be'na wasi'niwaka!

5 Sare' dare'nesi. Wabatirinya sa' kinaaya kwala naanga naanga (yirika 300 wawinya'ne nigwia) mubazi kwaji a'mwe nigwimaayaraavi nigwia kujaavadika!” Dinyina yeva “A'mwemili'gi baa'na yiwaa!” maanga widina.

6 Maanga mi'na widina kye' Jizaazai widina “A'mwe' mwaalana! Sara baa'na widivanigava! Niminyina tewaanya nawinya' nyiwakesira.

7 Sare' dare'nesi. Sariminyaba yuyagaa' a'mwe nigwimaayara mwaaidivi' ‘Wawinya maayaraavi tewaanya wideinyi,’ yawirapiyagaa' tewaanya jideihilyira. Wawimaayara yuna mwaaidivi' kiri' nimi sariminyaba yuyagaa' mamwaalyi yideinyira.

8 A'mwe sa' yanne'na yawa'. Dahaa' nimire kilaakejiki kanyidingiwa' dividaasi wabatirinakeinyi balideinyira.

9 Nebulya'na yihithiwa. Kwaaka yuyavakaavi yagaala tewaanya' widipi'devakaavi a'mwe' nyinike' gaminyi yawipi'de'na wijjwaakipi'desira.”

Juthaazai da' “Jizaazare yikamaangeraavi widima!”

(Matiyui 26:14-16; Luki 22:3-6)

10 Sagaa' gamire a'mwe ata yuyiraai sivilyiridaasi pwaraalyara mwaaidivi' a'mwe gavei Yizikeriyotiyai Juthaazai wo'nikei mwaaida “Kumi wila yirakipi'de'na widima!”

daka sipîzipîya Gotîyarîne tamira'divîta naangeraayawîna wîna.

11 Mi'na wawaka yagaala wîdîna kya' kumî yîlaaya marina yeva “Gimînyîna nîgwîa gîzavaana!” wîdîna ye'. Mi'na wîdîna kye' yawî'na “Kumî Jîzaazarî wîla yîrakîpî'de'na nîmî gara yîdeinyaka?” Yawîraka kuna yawî'na ya'.

Jîzaazalyî gamîrerajî tîka munne ne'.

(Matîyui 26:17-25; Lukî 22:7-14,21-23; Jonî 13:21-30)

12 Munne Gîrîkula lîwînya mamîlyade' gaai yîma'nyîna kya' sagaa' Parî'ma'munne sipîzipîya dîwînyarî Juyara tadîvîsagaa' gamîrera wîdîna “Nemî kwawaaajî gîmî Parî'ma'munne sipîzipîyarî dînade'na gava yovîrawakaajîwona?”

13 Sara wîdîna kye' gamîreraarî wîdaasîna ya' “Angeba wîlakîri a'mwe pwai aalîtalya' kînya marina yîwakerî duzîma'naawîla! Wîjîma'naawakîri angevî wîlaawadevanyarî dîmîdînyîla!

14 Saba angesîyarî duzîla! ‘Gotîyare yagaala wîjîwaakadei gîthîvanî! “Gavî ku'dîka yarînkêvî se wa'deva gavanaka? Parî'ma'munne'vî nîmîjî nîmîrerarî naadevanyîra.” ’

15 Kîrîmî sara kudakîri gavî ku'dîka naanga munyaba yarînkêvî nemînyîne namwaalyîtajî taivolîyajî warîkêvî yîhibwarîdaakwadevî nemînyîna wapaaya jovîrawakyîla!”

16 Tivi'na widaasina kya' gamireraai wawagila angeba wilaawina yagila dara wanganagilya' "Jizaazai sara nehithiwake dari!" Mi'na yawiragila Pari'ma'munne yuya yovirawakina yagi.

17 Sawisa' mena kajinna' sahwai gamirerari bina ya'.

18 Bina kya' wapewakamaranyavina asiraji dhaihi'na yadivi' namwaaidapi Jizaazai wida'na "Nebulya'na yithiwa. Sarimijya pwai niminyina yikamaangera wila nyirakipi'de'na nyimarimwaaihadei nimiji wapaa nivanigolyai niminyina yikamaangeraavi widadheli."

19 Sara wida'na kya' kuminyi kale wiadaa'nyi pwai wida'na "Nimi daaka? Nimi dingaka?" pwai wida'na "Nimi daaka?" yuyara sana sana wida'na.

20 Mi'na wida'na kye' sahwai wida'na "Atirai sivi'yiridaasi pwaraalyaihiyia pwalyi girikula maa'gula gavevi diwilavanivanigolyalyira.

21 Gotiyare bukuya' dinikabaaibisa'na 'A'mweraavine Kaimiraayai barya'nei wawadelyira.' We', a'mwei A'mweraavine Kaimiraayarina yikamaangeraavi widadhele! Sara kyoji a'mwe sari ganaange! mamaari yaji kwaji tewaanya kyadi!"

Jizaazai aalya waainiya' girikula wijaava'.

(Matiyui 26:26-30; Lukĩ 22:15-20; 1 Koridi 11:23-25)

22 Kumĩ nadaapi Jizaazai girikula maaraka Gotiyari wida' "Gimire yaya' makimwa. Su! Su!" Mi'na wida'na gunyina gunyina yaka wijaavaka wida'na "Dimaaryila! Da' nimore kilaakejikira."

23 Wîdaka kaapîvananya' maaraka Gotiyari "Su!" wîdaka wîjaavîna kya' kumî sara yuyara pwai nyîna pwai nyîna ye'.

24 Mi'na nyîna kye' wîdîna "Waainiya' mi'na niwaasa' yi, wîlimwagarîkeburîne nîmîre tawe' niwaasasi. Nîmîre tawe sa' giragîre a'mwe kwalaalyaraavîna bwalaravadesi.

25 Nebulya'na yîhîthîvanîge. Aalya waainiya' giraiþwîlyavîdaasa' ayîna manya'muji Gotiyai maremwaaideva waainiya mudîke' nîdehaa'nanyi. Arîkewînyi."

26 Tivi'na wîdîna kya' yîledaata pirî'na deva Mugunya Wolivîna kaanna wîna ye'.

"Nîmînyîna Pitai 'Maavelyî,' wîdathelyîra."

(Matîyui 26:31-35; Lukî 22:31-34; Jonî 13:36-38)

27 Jizaazai wîdîna "Sarîmî lika yapi nîmînyî dînyagalya'makwîdeihîlyîra. Gotiyai dara dînikesi. Sipîzipîya yî'dîvaiderî karamaka'muji sipîzipîyara likaanya yîwînadaapi'derera.

28 Sara jîde kirî' nîmî kabala'muji kanyadîkaavojî Galîlineinyî sinnawî yîhibwaramakwaanîdeinyî waanîdera."

29 Sara wîdîna kya' Pitai wîdîna "A'mwe yuyara kyagîhalya'makwopi nîmî aawa!"

30 Jizaazai wîdîna "Nebulya'na gîthîwa. Sawîta dahaasagaa' nîmînyîna 'A'mwe sarî mwanganyainyîra,' duthatheigînyîra. Dahasaai dahaa' kada'gîzî kukuraayai yagaala pigasaai dathelyîra."

31 Sara wîdîna kya' yagaala diragînna baziwîna "Gîmînyîna 'A'mwe

sari mwanganyainyi,' maji yiwija' nehiramakipi'deinaalyira. Arikawi." Gami sara widake' yuyara sara widina ye'.

*Gazamani saba Jizaazai tibariyagaala wida'.
(Matiyui 26:36-46; Luki 22:39-46)*

³² Yaayeba Gazamani wo'nikebanna wina kye' sai gamireraavi widina "Nimi tibariyagaala widadaa'muji dava dalamwaalyila!"

³³ Pitalyi Jemizalyi Joniji saraavi pibanna makuna yaka lika kya' gamire kale dusina ginyiwanna'na kya'

³⁴ kuminyi widina "Nimire kale dusina nyiginyiwanna'mwake' balideinyi dingaka? Dava mwaalapiji divaihanaryi!"

³⁵ Sara widina yaka sangiri'na wawaka kwaakevina wala'na yaka tibariyagaala widina "Daanga nyivnadehaa'na githiwa. Niminyina 'Daanga mavinannera!' diza' daanga nyivinya'ne' myima'nyi yana!

³⁶ Tataai, Nimwai, diraginaangeigi, yuya nayaa yinneiginyira. 'Daanga nuvinadika! Sabwi marasi'nima!' diza' dimarasi'na! Kiri' simunya nimireburidaasi minnera! Aawa. Ginnyaburidaasi ja!"

³⁷ Ayina baka dara wanganake' "Se dakava!" Daka Pitar'i widina "Saimoni, se daki? Maalikegaa' mabaihanarij'waa?"

³⁸ Sarimi tibariyagaala dithavaihanarila! 'Saataani kayaa'na naneyadika!' majaihi 'Nemi nayaa baihanaraana!' kuryaraavi yawi'maniga'. Sarimire kilaakejiki maa'na naanga yihimanike'na se wa'mwaa'."

39 Sara wîdaka ayîna wawaka tîbarîyagaala wîdake' ayawîdaasi wîdîna.

40 Mi'na wîdîna yaka ayîna baka dara wanganake' "Se dakava!" Sare' dare'nesî. Kumîre tînnîya se'na yîdaakwe'. Sara kada' kumî dîna "Nemî berî' wîdaaziwona?" deva navîka mwaalîna ye'.

41 Dahasaai dahaa' yagalaawaka wîdîna "Kwazaaka se wa'manîgasaihi daaka? Mi'nanyîra. Yîthaanyi, dahaa' kyîma'nîwa' A'mweraavîne Kaimîraayainyî tamakya'na pwai kayaa'nanyaraavî malya'neraavî mena wîbwarîdaakuwaka!

42 Dîthaayîla! Nemî wîrata'naana! Yîthaanyi, nîmînyîna yîkamaangeraavî wîbwarîdaakwakei yînî'."

Jizaazarî wîla pwîye'.

(Matîyui 26:47-56; Lukî 22:47-53; Jonî 18:3-12)

43 Sagaa' wîdadaa'nyî yîme'nyî'bi' Juthaazai a'mwe atîraai sîvîlyîrîdaasi pwaraalyarajîya pwai bîna. Gotîyarîna mubîthîka yîra'dîvîta naangerajî Juyaraavîre Kîwîjarajî Juya naangerajî sara wîdaasîna kye' kwala naanga mwaalevera kwaari'masîramînya, kîlyî'gwahaalya lîmwanna yevera Juthaazalyî bîna ye'.

44 Sînnawî sagaa' yîkamaangeraavî wîbwarîdaakwakei wîjîwaakakei "Nîmî yîlaaya mariwîjai sahwalîyî. Nayaa lîmwagapîjî nayaa baihana'dîvî' dîmakwîla!"

45 Sara wîjîwaakakei baka yîme'nyî'bi' gamînyawînna wîjîmaatavaka wîdîna

“Naangeigi!” Tivi'na widaka yilaaya marina ya'.

⁴⁶ Yilaaya marina kya' aawilasara ata galalimwanna yeva wila yirina.

⁴⁷ Wila yirina kye' daavesarajiya Jizaazarei akwai, kwaari'masiraminya' maaraka sipizipiya Gotiyarina Yira'de Naangere yaasiwa'wawinyari yiri'gainyina yaka gamire kadikiki lihwi'na ya'.

⁴⁸ Sara kya' Jizaazai malya'neraavi widina “Kuka yipalamaa'dinyainyi daaka! Kwaari'masiraminyaji kiliyi'gwahaalyaji limwanna yeva ‘Yipalamaa'deibisari wila yiraana!’ deva davi'vaniga'!

⁴⁹ Gazagaasagaa' yirikeryaavi Gotiyare Angevi sarimiji mwaaidi yihiziwaakadinyagaa' wila manyiryadivisaihiyi. Aawa. Sa'na kigaakuna Gotiyai dinike' yune'na yima'nana!”

⁵⁰ Tivi'na widina kya' gamirera yagalya'ma'na yeva likaanya wina ye'.

⁵¹ Miginya akwai kwaabihannya pirina yewaa'bwa'nakei midinna kya' pwara kwaabihannya' galamwagi'nyina kye'

⁵² kamagaduyivale' kannyimaayai kaanyave'na wina ya'.

A'mwe naangeraayawi Jizaazai mwaala'.

(Matiyui 26:57-68; Lukî 22:54-55,63-71; Jonî 18:13-14,19-24)

⁵³ Jizaazari Gotiyarina Yira'de Naangeryawinna makuna yadaapiji Gotiyarina yira'divita naangeraji Juya naangeraji Juyaraavire Kiwijaraji yi'bwa'nigavina.

54 Yi'bwawina'ngavina yadaapi Pitai menyaba midinaawina yaka Gotiyarina Yira'de Naangere angwaasavi wina kya' damerari mwaaleva dika yimwannyina.

55 Dika yimwannyina yadaapi Gotiyarina Yira'divita naangeraji kaajoliya yuyarari sara dinyina “Nemi tamakaade'na a'mwera dina 'Jizaazai kayaa'na yakevi wanganena,' dipi'dera gawi mwaaihava?” Dinyina kye' kiri' a'mwe sahwaru mamwaalyina.

56 Sare' dare'nesi. A'mwe pi'jaakuna gaminyina kwaasi yagaala jalikurakesa' kiri' kumire yagaala avaananya' majasi.

57 Pwara daavina yeva kwaasi yagaala dara w'jalikurakina

58 “Gami dake' nemi wi'no. Dara da' 'Gotiyare anga da' a'mwera yavikaryaasa' kayaaka yigala'muji yirika daryaai dariki anga piri' a'mwera mamaji yipi'de' madideinyira,' sara wi'no.”

59 Sare kiri' kumire yagaala ge' ge' dina yesa' avaananya' mika.

60 Gotiyarina Yira'de Naangei tinnyaba daavaka Jizaazari yiwaara'na “Yagaala piri' mama'maa'dinneigi daaka? A'mwe dara jalikurakya aane pi'bwu ki'bwu mama'maarijiwaana?”

61 Sara yiwaara'na kya' sahwai yagaala majai aane piri' kiri' marivikiri ya'. Pigasaai Sipizi'piya Gotiyarina Yira'de Naangei yiwaara'na “Kiraazitiyaigi daaka? Gotiyai tewaanaanga yinikere kaimiraayaigi daaka?”

62 Sara yiwaara'na kya' Jizaazai wiðina “Sahwainyîra. A'mweraavine Kaimîraayai Gotiyai ðiragînnakere aangasîmagî kamwaalojî Gotiyalyî maremwalyîkaderaarî danganyidelyîra. Nabaai yîraaya sigunyavî wa'dengi gamî walaabathelyîra.”

63 Mi'na wiðina kya' Gotiyarîna Yîra'de Naangerî sinna tîka kudava' baazi'ma'nya' maralihîvainyîna yaka yuyaraavî wiðina “Nemî tivî'na wi'nîwo' gamînyîna yagaala jalîkurakya'ne pwaraavîna nemudaasîwakeina daaka!

64 Gotiyarîna yagaabîraizîka ðîwake' sarîmî mi'na wi'nîwaava. Beri' ðîzijîwaa'?” Sara wiðina kya' yuyara jîda'na “Kayaa'nanyabwi yîwake'na balana!”

65 Pwara gamînyî maagwala wopwakîna yeva gamîre sinnyavî bwakakîna yeva asîlyî gwamwagaranna yeva wiðina “Gotiyarî wi'na'gîzî ðînejîwaakya! ‘Aai gîramwaka?’ ” Mi'na wiðina kye' damera gamînyî araraalyajî tamamakuna ye'.

Pitai wîda' “Sai myawîrivanîge.”

(Matîyui 26:69-75; Lukî 22:56-62; Jonî 18:15-18,25-27)

66 Kwaakeba angwaasaba Pitai mwaaidî'nyî Gotiyarîna Yîra'de Naangere wawînya wîdaayade' baka

67 Pitai ðîka yimwannakerî tînna wanganaka baihana'na ya'. Baihana'na yaka wiðina “Gîmîjî Naazaretî mwaalyai Jizaazaryaba mwaaidînyaigînyîra.”

68 Sa' wîdîna kya' Pitai “Nanyîrabîka!” daka kwaasi wîdîna “Arikawînyî. Gîmî nyîdîwaanya' myawîryadînyainyîra.” Mi'na wîdaka adîkurya savîna mwalaawîna.

69 Mwalaawîna kya' wîdaayade' wanganaka a'mwe yaasiwa'mwaalyaraavî ayahi wîdîna “A'mwe dai kumîjîyalyîra.”

70 Pitai nabaai wîdîna “Arikawînyî.” Divi sagaa' kibawegaa' a'mwe yaasiwa'mwaalyara Pitarî ayahi wîdîna “Nebulya'na gîthîwaka. Kumîjîyaigînyî. Sare' dare'nesî. Galîli mwaalyaigînyîra.”

71 Sara wîdîna kye' yagaala diragînya wîdîna “(Daaina!) Gotîyaryaba nebulya'nanyasîra. Kwaasiya'na mîka! Sarîmî dîwaata a'mwe sarî mwanganyadînyainyîra.”

72 Mi'na wîdîna kya' yîme'nya'bi' kukuraayai yarai pîgasaai dîna ya'. Dîna kya' Pitai yawî'na ya' “Jîzaazai sara nyîdîwa' 'Kukuraayai pîgasaai jaka majî kyojî nîmînyîna dahasaai dahaa' julyakîdeigînyî.’ ” Pitai sara yawîraka “ ‘Jîzaazareinyî mîka,' be'na wîdîweinyaka!” kale kwia' kînna bazîwîlaawîna ya'.

15

Paailatîmyaba Jîzaazai daava'.

(Matîyui 27:1-2,11-14; Lukî 23:1-5; Jonî 18:28-38)

1 Mwanyagaa' yîrîke' gaai pu'daa'nyî yîme'nya'bi' Gotîyarîne tamira'dîvîsarajî a'mwe naangerajî Juyaraavîre Kîwîjarajî kaajoliya pwarajî sara gamînyîna jamungajîna.

Mi'na jamungajina yeva Jizaazari wila pwiyina, Ga'maaniyai Kwaaka Juthiya maremwaaide Paailatimyawinna makuna yeva sari marimwaaihina.

² Marimwaaihina kye! Paailati gaminyi yiwara'na “Juyaraavi maremwaaidinyaigi kingiyaigi daaka?” Yiwara'na kya! Jizaazai widina “Gimi nyidawaanya' nebulyasi.”

³ Sara widina kya! Gotiyarina yira'divita naangera “Gamire kayaa'na yade sanna Paailatimi wijiwakaana!” deva kwaasi yagaala kwalaalya wijywaakina.

⁴ Mi'na wijywaakina kye! Paailati ayina yiwara'na “Tivikita piri' kiri' ja'nadina jitheigi midaaka? Yithaa, giminyina kayaa'nanya kwalaalya nyjiwakawaasange!”

⁵ Yiwara'na kya! Jizaazai yagaala aane piri' kiri' majai mwaalake'na Paailati atika maru'na'na ya'.

“Jizaazai balana!” wide!

(Matiyui 27:15-26; Luki 23:13-25; Joni 18:39-19:16)

⁶ Kwazaaka naanga munne yanyagaa' yuyagaa' Juyara Paailatimi widadivisare “Ayabaaibi' kalavuzari yunakaanya duthaasa!” Sara dinike'na Paailati sara yakelyi.

⁷ Sagaa' a'mwera kwaakevaki maremwaaidivisaraavi mala bwa'daaveva a'mweraavi karamake' naangera kalavuzangevi wimwaaihina. Kalavuzangevi wimwaaiheta pwai Baaravaazai wo'nikei mwaalina.

8 Mwaalina kya' kwala naange' beva Paailatimi gaai widina “Dahaa'na neminyina ayina yiyabwi yaginya' sara ja!”

9 Widina kye' Paailati widina “A'mweihi, Juyaraavi maremwaaideri wila yaarijiwa?”

10 Sare' dare'nesi. Paailati dara yawirakelyi “A'mwe kwalaalyara Jizaazari yilaaya wimariwaasa'nanyi. Gotiyarina yira'divita naangera tiganaarya yadivi' kotiyavi mariwimwaaahina yiwaava.”

11 Mi'na widina kya' Gotiyarina yira'divita naangera kwala naangevi wijiwirina “Jizaazai wamaryana! A'mwe Baravaazari nejaavana! yarai duzila!” Sara wijiwaakina kye' sara yina.

12 Mi'na yina kye' Paailati ja'nawidina “Nyidiwaasa'na ‘A'mwe sai Juyaraavi maremwaaidela,’ dadivisarina gara yijiwa?”

13 Widina kya' ayina jaka danganna “Yisaviri tamakya'na niliya diramo!”

14 “Baa'nevaka? Be kayaa'nanya yiwakalaka?” Sa'na widina kya' kwala bwa'naanya' jaka naanga danganna “Tamakya'na yisaviri niliya diramo!”

15 Sara danganna kye' Paailati “Kwala bwa'naanya nimityina yilaaya yipika!” daka Baravaazari wila yaaraka dameraavi widina “Jizaazari wila nilinakebaalyi tamapiji yisavi niliya jeramyila!”

*Aawilasara Jizaazari birala ye!
(Matiyui 27:27-31; Joni 19:2-3)*

16 Kwaaka Juthiya maremwaaide angwaata Pîratoriyamî (kotî ange!) wo'nîkewîna dam-era Jizaazarî jîvwaramakwaweve aawîlata yuya pwaraavî jaka jîvwaramaa'na.

17 Jaka jîvwaramaa'na kye! yuyara yîkabeve “Jizaazai kwaasîkingiyai yîma'nana! Bîrala yaana!” deva kingiyîvîta wayaake! egwevî marajîkîreva wîla lannakesî gîhîpaleva gamîre mînyagînyavî maramwaaihî'na.

18 Maramwaaihî'na yeva bîralya'na wîdîna “Naangeigî, Juyaraavî maremwaaidînyaigî yuyaga! dîmwaaideigîne!”

19 Sara wîdîna yeva yîsarîsî mînyagînyavî tamîna yeva gamînyî maagwala wopwakîna yeva “Naangelyîra,” kwaasîya! deva kwadaai gîle!.

20 Bîralya! sara yîna yeva yîvîta wayaake! mararaakurasî'neva gamîre baazî'ma'nya! marajîkîreva “Yîsavî nilîya wîramaana!” deva jîvwaramakuna ye!.

Yîsavîri Jizaazarî nilîya yerame!

(Matîyui 27:32-44; Lukî 23:26-43; Jonî 19:17-27)

21 Tusavî Saaimonî Anga Saairini mwaalyai, Alekîzaadalyî Rupaaazalyî saraarî kîrînîmaangei wawînyabadaa'nyai Jeruzaalemînei wîrata'nyîna yeva aawîlasara naanga wîdîna “A'mwe sare yîsa! dîmakîlaawa!” Mî'na naanga wîdîna kye! Saaimonî yîsa! makîlaawîna.

22 Makîlaawîna yadaa'nyî Mugunya Golîhotabanna Jizaazarî wîjîvwaramakuna. Golîhota “Gîlemînyagînyabanna,” dînîkesî.

23 Saba “Daanga naanga nuvinadîka!” deva aalya waainiyavî kiwata mirîya wo'nîke yîkeva “Da' dînana!” widîna kye' “Aala!” widîna.

24 “Aala!” widîna kya' aawîlasara Jizaazarî maareva yîsavi nilîya wirameva “Gamîre yîvîta baazi'ma'nya saza japalaana! Saatuya yawaajî ata gîlyavî wanganawaajî japalamakwawaana!” deva saatuya yeva gamîre baazi'ma'nya jaa-paina.

25 Sagaa' yîsavi nilîya wiramesagaa' mwanjavî naainî kîlokiyagaakîra.

26 Tamakya'ne pikarya “Kingiyai Juyaraavîre maremwaaidei,” yîdaveva yîsavi munyaba yîlakîna.

27 Yîlakîna yeva gamîre aangasîmagî a'mwe pwari kwanaamimagî pwari nilîya wirame' kuka yîpalamaa'disaraarî.

28 Sa'na wiramîna kye' sagaa' Gotiyare bukuya' dînîke' yuneba yîma'na'. Yagaala sa' “Kayaa'nanyaraavî sara yîpî'de' gamînyîjî sara yîpî'delyîra,” dînîkesîra.

29 A'mwe a'mwera wavîlavesa kunnya mînyagînyara wînaangî'nyî wînaangî'nya yadaapi bîrala dara wîna. “A'a! ‘Gotiyare Angevî kayaaka yîgalamwî yîrîka dawaai dasangî mamwîneinyî,’ nedahînyaigî,

30 sahwaigî gîmî saigî gaimwanna'gîzî nilîya lawasî'na'gîzî yîsavîdaa'nyî dalaama! Dîvadaihasamaa'nana!”

31 Sara bîrala widîna kye' nabaai sabaabî' Gotiyarîna yîra'dîvîta naangera Juya yagaaikîwîjarajî Jizaazarîna bîrala dîne'

“Pwaraavina diraginna padaihasamaarakele!
Gami sahwai padaihasamaa'nannele!

³² Kiraazitiyai Yizireliyaraavi maremwaaidei kingiyai yisavidaasi kwalaabozî wanganawaaji gaminyi nayaa limwagaraade'nanyi.” Birala sara dinyina kye' gaminyawi pwaraai niliya wiramesaraai birala widina yagi.

Jizaazai bala!

(Matiyui 27:45-56; Lukî 23:44-49; Jonî 19:28-30)

³³ Sirigwajahaa' kyima'na' kwaakeva' yuyava' yirika kigaa' jihinya' jinnaka tiri kilokiyagaa' jihinya' mi'na jinnakegaa'nanyi.

³⁴ Sagaa' tiri kilokiyagaa' Jizaazai jaka naanga gannya yagaalya' danganna “Eloi, Eloi lama savakitaani.” Yagaala sa' aangyagaala “Nimire Gotiyaigi, nimire Gotiyaigi be'na nyagalya'ma'mwaana?”

³⁵ Jaka sara danganna kya' saba daaveta pwara wi'neva dinyina “Yithaanyi, Yilaajari jaka widiwaka.”

³⁶ Dinyina kye' pibanna pwai kaanyave'na wawaka aalya waainiya yirikevi saalaalyaviya jimi'nya' marapaihaka aalinake' yisarikire sinnyariki wakaka “Aalya' nana! Pizigwa mwaalana!” daka makilaawaka pwaraavi widina “Kavaayila! Yilaajai bozi yisavidaasi makwalaabaza' wanganaadera.”

³⁷ Widina kya' Jizaazai jaka naange' widaka simudinya yinahu yeki'na ya'.

38 Gotiyai Gotiyare Angevi janne naange! jiki'nike! munyabadaasi kwaakewinna kayaaka dabura! yuneba.

39 Jizaazarî niliya tameta yisavi aawilata naangei Anga Romî mwaalyai maredaavakei dara wanganake! “Sara davaimwaka!” Daka widina “Nebulyasira. A'mwe dai Gotiyari gawaalivaangelyira.”

40 Widadaa'nyi keiba a'mwe daaveva tinna wanganna. A'mwe sa, Maariyaa! Maahithaala mwaalyasi Maariyaa! Jemizai diviyalyi Jozizalyi kidaraari kirinaangesi Saalomiyasi sa

41 Jizaazai Kwaaka Galili mwaalakegaa! kaanya ye'mwannayamaryeva wapaaya aalya wijaavesaji a'mwe piniji Jizaazalyi Anga Jeruzaalemîna yilaabeta a'mwe piniji sangyineba mwaalina yeva tinna wanganna ye!

Jizaazarî likyîrake!

(Matiyui 27:57-61; Lukî 23:50-55; Jonî 19:38-42)

42 Sawisaburi kyima'na! Jozepiyai Aarimathiya mwaalyai bina.

43 Bina yakei a'mwe tewaanyai Kaajoliyai sagaa! Gotiyai Kwaaka yuyavaki maremwaaidethaa'na kave yemwaalakelyi. Jizaazai balakegaa! Piraaidethaa! Jozepiyai “Kwazaakegaa! gilaayai enana naribainadika!” daka Juyaraavire Kwazaakegaa! yovira'daapiyagaa'na diraginna yivaimwanna yaka Paailatimyawinna baka Jizaazare kilaakejikina widina “Gilaayai walyamarirakima! Nyimaryaama!”

44 Sara widina kya' Paailati maru'na'na “Ai, dahaa' mi'na davalika?” daka aawilata naangerina jivwaramaa'na. Sara jivwaramaa'na kya' naangei kulaaba' yidaanganna “Jizaazai mena baimwakei daa!”

45 Yidaanganna kya' sai “Yo. Mena baimwa!” widina kya' Jozepiyari widina “Wikira. Gilaayari dulamaraawa!”

46 Sara widina kya' Jozepiyai wawaka kwaabi'yivita saamina yaake' mubyawalyaadikei yisayabanna baka gaminyi makwalaabaka yaakesi yewa'mwagapwiyaka makulaawaka kavininnyavi simaangevi lilividaakunikevi wilakaka sila naangei simaangevi tihirakina ya'.

47 Jozepiyai sara yadaa'nyi Maariyaa' Maahithaala mwaalyasi Maariyaa' Jozizari ganaangesi gamire wakya'neba tinna wanganna yagi.

16

Jizaazai baryai ayina dikaava'.

(Matiyui 28:1-8; Luk 24:1-12; Jon 20:1-10)

1 Kwazaakegaa' mi'na kwavilava' Maariyaa' Maahithaala mwaalyasi Maariyaa' Jemizari ganaangesi Saalomiyasi sa “Nemi Jizaazare kilaakejiki puraana!” deva marazinanya wabatirinnake' mubina.

2 Mena mubina kye' Saadehaa' mwanyavi yirike' gaai pu'daa'nyiyagaa' simaangevine a'mwe kaanna wina.

³ Kaanna kuna wina yesa dinyina “Silaangei kavi'nimaangevi warikeri neminyina aai baasadelaka?”

⁴ Sara dineva maranganna yadivi' dara wanganesa! “Ai, silyai mena davaasinika!” Sare! dare'nesi. Sila sai wapeminnakei warakelyi.

⁵ Mi'na deva simaangevi wilaawina yeva kuminyi aangasimagi miginyai kwaabihannya yaaka nawinya' yira'nakeri tinna wanganna. Tinna wanganna yeva lika yina yeva atika maru'na'na.

⁶ Atika maru'na'na yadaapi miginyai widina “Lika mipinera! Jizaazai Naazareti mwaalyari yisaviri niliya wiramwa'daasarina bi'manigava. Sara yawi'mwa. Kyidikaamwa' dava mamwaalyika. Yithaanyi! Wakiwa'daasaba danganyila!

⁷ Sare kiri' wawopiri gamireraji Pitalyi saraavi duthaawila! ‘Sinnawi Kwaaka Galili kwaana'muji sarimi nyimidinaabyidera! Mi'na yithethevaabi' saba dinyanganyideinyira,’ sahwai sara nyidiwa’.”

⁸ Sara widina kya' simaangeyabadaa'nya kaanyave'na walyaweve likaanya wina. Sare! dare'nesi. Bi'bita yadivi' lika yeva simunya nayaa myawiri. Likaanya wina yeva aane pware kware aane pirivi kirivi muji ye! Sare! dare'nesi. Lika naanga wiake'na sahini kunna marinaawina yesangi.

*Maariyaa' Maahithaala mwaalya' Jizaazar
wangana'.*

(Jon 20:11-18)

9 Saadehaa' yîrikunyagaa' Jizaazai dîkaavaka sinnawî Maarîyaa' Maahîthaala mwaalyavîdaasi yîmaka ati ata purîdaa'nyî pwaraalyaraavî marasî'nakevî gamînyîna wîjîwaaîna'.

10 Wîjîwaaînaakegaa' a'mwe sa' wawaka gamîjîyara yîkwaraamaya dadaapiyaraavî buthîna “Jizaazai kwaihwaaînaakei mwaaidî'nyî wangamwerînera.”

11 Sara kadîka wî'neva “Kwaasî yagaala nedîwaka,” dînyîna yeva sa'na malîmwagi ye'.

Gamîreraai Jizaazarî wanganagi.

(Lukî 24:13-35)

12 Sara yîna yesagaa'daasî a'mweraai wawînyanneba kaanya kyamaryagi sahwai mudîkeibîsai wîlaabaka pîgasaaî wîjîwaaîna'.

13 “Jizaazalyî,” sara yawîragîla ayîna wawagîla gamîre pwaraavî wîdîna kyagi sahwaraare yagaalya'na “Kwaasîya',” dînyîna yeva sa'na malîmwagi ye'.

Jizaazai gamîreraavî wîjîwaaîna'.

(Matîyui 28:16-20; Lukî 24:36-49; Jonî 20:19-23)

14 Dîvidaa'nyî angevî gamîrera atîraai yaka sîvîlyîrîdaasî pwaina sarera wapaaya tîka nadaapi sahwai wîlaabaka gamî mena dîkaavakerî pwara tîna wanganewa gamîre pwaraavî wîdesa' malîmwagyesa'najî sîmunya myawîryesa'najî maanga wîdîna.

15 Maanga mi'na wîdaka wîdîna “Yuyabanna Kwaaka yuyavakîna wawopîjî yagaala

tewaanya' Gotiyai wakyaka yuyaraavi duziwaakyideihilyira.

16 Savine'na pwai kanyilimwagaroji aalyavi bavitaaziya kyapi Gotiyai kayaa'nanya marasi'nada padaihasamaaradelyi. A'mwe pwai manyilimwagaryoji gannya kayaa'nanya yinahu waragothengira. Sahwari jidavadelyi.

17 A'mwera kanyilimwagarapi wijiwaainya dara yima'nade. Nimire diraginya' maarapiji niminyine yayavi yimakeraavi a'mweraavire munyikaavidaasi widaasipi'de. Nabaai Maaveraavire yagaala widipi'de.

18 Naawinaanyari maarapiji aalya nabaidivisa' napiji mabalyi yipi'de. Arikawinyira. Nabalnakengire minyaginyangi ata kadathiwagapiji nabalnake tewaanya mwaabi'de. Sara yima'nipi'dengira," widina ya'.

Jizaazai Gotiyarebannei Sigunyavina yilaawa!
(Luki 24:50-53; Apozeliyara 1:9-11)

19 Sarevidaa'nyi mi'na widina yakegaa' Gotiyai Naanga Jizaazari makilaawina. Sara makilaawina kya' Gotiyareba Sigunyavina Jizaazai yilaawaka Gotiyare aangasimagi walamwaaina.

20 Mi'na walamwaaina kya' gamirera waweve yuyaba wijiwakadaapiji Naangei wigaimwaga'. Kugaimwaga' gamiji nawi'nya kye' a'mwera tinna wanganya'nera dara wija'na "Yagaala sa' Gotiyaresira," sahwai wijiwaainya ya'.

**Yipma Genesis and New Testament
Genesis and The New Testament in the Yipma/Baruya
language
Buk Stat na Nupela Testamen long tokples Yipma long
Niugini**

copyright © 1993, 1994 Wycliffe Bible Translators, Inc.

Language: Yipma (Baruya)

Translation by: Wycliffe Bible Translators

Video recording © The Jesus Film, a project of Cru.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

PDF generated using Haiola and XeLaTeX on 18 Apr 2025 from source files dated 9 Oct 2020

ef60f748-49e3-5ee0-8e6d-a25b74b7a93c